

仁壽縣志卷一

輿地志

沿革

疆域

附形勢

山水

壩洞石附

城池

官署

關津

圖附

沿革

禹貢梁州之域漢犍為郡武陽縣東境屬益州部

李元注縣在周為蜀國地秦為武陽縣地縣治在今

彭山縣東十里距蜀郡百餘里當屬蜀郡漢高帝分

巴蜀置廣漢郡武帝分巴廣漢置犍為郡縣始改隸

孝昭帝犍為郡治移武陽東界資中西抵臨邛北接

廣都南通南安盡今仁井眉彭四州縣地今西北境

仁壽縣志

卷一

輿地志

廣都也

晉置西城戍

晉孝武太原中益州刺史毛璩置西城戍以為捍衛

梁置懷仁郡天監中立席郡

西魏置普甯縣蒲亭縣屬懷仁郡普甯縣為州郡治置

和仁郡平井貴平可曇三縣後周置陵州置籍縣廢可

曇平井二縣入貴平

隋開皇三年罷席郡為籍縣以普甯屬陵州十年置始

建鎮十八年改普甯曰仁壽縣大業初廢籍縣入貴平



廢蒲亭改井研廢州爲隆山郡統縣五仁壽貴平井研始建隆山五年改始建鎮爲縣

唐武德元年復隆山郡曰陵州九年割隆山屬眉州永徽四年分貴平置籍縣屬陵州天寶元年改曰仁壽郡乾元元年復爲陵州屬劍南道

唐元宗諱隆基改隆山郡爲仁壽郡

宋至道三年陞州爲團練使咸平四年廢使爲州並廢始建縣爲鎮熙甯五年廢州爲陵井監廢貴平籍縣入廣都宣和四年改陵州監爲仙井監隆興五年改監爲仁壽縣

仁壽縣志

卷一

輿地志

二

隆州乾道六年復置貴平籍縣屬仙井監

陵井監圖經漢張道陵經此地有山神稱十二女指陵上開鹽井監以陵名志地也文同謂因張陵以名井復因陵井以名州大觀四年改名仙井避其諱云元憲宗時廢貴平籍縣入仁壽至元二十年廢陵州以縣屬成都府至元中廢井研入仁壽後復置

明仁壽縣屬成都府洪武十年廢井研入仁壽後復置國朝雍正五年仁壽縣改屬資州



輿地志

疆域 附形勢

縣治在成都省城東南一百九十里州西北二百六十  
五里四境北華雙新眉南威榮井相去三百里間西彭  
青東簡陽資羅相去二百里間治在三隅山間適居中  
東距廖家灣一百二十五里接資州界又一百四十里  
抵資州治又東距青龍場一百六十五里接資州羅泉  
井界又三十里抵羅泉井州判署又東距鎮金橋一百  
里交簡州界又八十里抵簡州治又東距茨笆坳一百  
仁壽縣志

卷一

輿地志

三

二十里交資州界又交資陽界又六十里抵資陽治南  
距分水嶺一百七十五里交威遠縣界又一百二十里  
抵威遠治又南距復興場一百五十里交榮縣界又十  
里抵榮縣治又南距界牌舖九十五里交井研縣界又  
二十里抵井研治又西距河壩子六十五里交青神縣  
界又四十里抵青神治又西北距分水舖二十里又十  
里至土地坎又三十里至黃豐場交彭山界北距光相  
場四十里交眉州界又三十里抵眉州治又北黃豐場  
六十五里交彭山縣界又三十里抵彭山治又北距嘉



禾莊一百三十里交新津縣界又六十里抵新津治又  
北距華嚴寺一百二十五里交雙流縣界又二十里抵  
雙流治又北距秦皇寺一百四十五里交華陽縣界又  
七十里抵華陽治縣境自府河蘇馬頭場街半屬華陽  
半屬仁壽距治一百六十五里河分東西河東徑上小  
山至秦皇寺場華陽仁壽連界距治一百五十里下至  
尖茶溪場距治一百三十里石滾河高店子仁壽界左  
轉大林場距治一百二十里直上大山馬跑泉山東仁  
壽界山西華陽界向北徑至單頭山簡州華陽仁壽三  
仁壽縣志

卷一

輿地志

四

縣交界距治一百八十里徑下高山傍山東徑牛角寨  
分水左邊十里高家場距治九十里仁壽界過余家寺  
至湧泉寺山門外仁壽抵簡州界轉右龍雲寺仁壽簡  
州連界傍右徑至簡州界鎮金橋場場下一里綠水河  
邊有仁壽簡州界牌距治一百里下至龍江寺左袞至  
魏家溝腰店仁壽簡州連界距治一百里左轉老龍場  
右仁壽界左簡州資陽界距治一百一十里右轉趙家  
場辜家溝畫匠溝與資陽連界下至乾古井九嶺埂抵  
資陽界下至茨笆坳仁壽資陽資州三處界又縣北蘇



馬頭場府河西華陽東仁壽直下八里奉國寺十六里  
古紅花場二里道士溪二里古佛洞府河西仁壽界距  
治一百二十里越牧馬山彭山界沿河下五里嘉禾莊  
與彭山縣河分東西河以東仁壽界入里黃龍溪錦江  
匯岷江半邊街雙江口場抵彭山界越小山一路抵眉  
州界至光相寺距治六十里與眉州連界下至龍居場  
亦與眉州連界至河壩子場場街半屬青神半屬仁壽  
徑上大山周家坡前下山石馬寺高河坎三十里仁壽  
井研界牌近觀音橋十里距治九十里轉至迴龍場與  
仁壽縣志

卷一

輿地志

五

榮縣連界松峯場距治一百二十里南至陳家沱距治  
一百五十里仁壽界轉至汪家場上老山至碗廠距治  
一百六十里俱與井研連界至高頂寨兩母山距治一  
百七十里抵威遠界又一途向東牛頭寨馬頸坳至石  
金岡場距縣一百六十里場前十里與威遠連界有界  
牌直走大茅山抵資州界下山到羅泉井下河抵資州  
界橫走至觀音坡抵資州界有界牌至穿山洞距縣一  
百一十里抵資州界吳家坳距縣一百二十里抵資州  
界寨子寺車槽坳距治一百一十里抵資州界



形勢附

環縣皆山治居三隅之中迴合有自然之勢飛泉障其  
前隆山枕其後左峙翳嘶右據金鳳跨天池之絕頂挹  
官渡之清流界接十三州縣延袤數百餘里疊嶂重巒  
平疇曠野綺交脉注於其間大有關乎保障江流稍遠  
溪澗頗多無汪洋之大觀皆有利於農田原其山澤迴  
環土田沃饒雖處僻壤亦一隅之樂土也

蕭尙禮縣屬八景詩園林樂道艷陽仙樓閣翳嘶應  
雨阡芝嶺春霞橫秀帶蘭溪秋水泛鯨川玉屏屹立

仁壽縣志

卷一

輿地志

六

因晴日野寺鐘鳴為曉天更有一般清趣味夜深寶

月浸飛泉

凡若題縣六十八景陵井三隅石曰入

趁晚故園瑞竹毀廟靈泉聖泉變色覺山異光瑞雲  
土阜甘露碑陰跨鼇石姥落馬土神放生池滿誓妖  
井埋印山捫膝甯園洗心籍田息壤古井飛泉小隱  
蘭溪高科芝嶺山紛紅霧土燦丹砂書亭蓮花道園  
石笋石印馬蹄溪橫龍骨聖人稱鬪孝女表碑鴛鴦  
楊柳鳳凰豔陽浴馬川流飛鳳巖峙兩母俯臨獨孤  
遠逝菩園書匾儒社琴台鐵花兩樹玉泉一菴金馬  
沉寶石龜效靈磬笙響水風雨好天濡硯水涸懸積  
風搖蒲亭鐵山藕塘石井仙閣蓬萊官堂霄漢涇池  
鑑物古洞避兵仙人石鼓僧客玉屏蒼草出筮紆竹  
生歧鳳里多賢龍巖絕雅一尊洞佛半影鑿仙瀛洲  
快活雪月翳嘶石刻仙井巖磨佛龕東漢仙都崑崙  
小石堤江佛  
堰亭巖賓峩



輿地志

山水

附河壩石

山屬

三隅山在治東西南東隅曰飛泉山西隅曰跨鼇山南隅曰翳嘶山東隅西隅南隅三山相對去陵井各一里故名三隅古謠三隅青陵陽榮三隅翠陵陽貴

張紹祖曰有岡北來莫窮所自欲薄城下歧而為三行且五里虎踞盤礴不復去陵陽之所謂三隅也名勝記謂跨鼇山卽州衙坐山俗謂卽飛泉山飛泉跨

仁壽縣志

卷一

輿地志

七

鼇東西兩分去陵井各一里陵井在豔陽洞旁超覺寺前有古井卽飛泉未知跨鼇爲何山也故當以益州記爲正

跨鼇山脈亘數里其狀如鼇望之無際

王爾鑑詩何處珊珊鳴瑣玉凌霄峰聳挂雲綠掃塵來上跨鼇山天風吹動琅玕竹 姚德椿集唐歌清曙蕭森載酒來東山朝日翠屏開我欲上山山路險噫吁戲危乎高哉薛銜荒磴移柔屐綠藤陰下鋪歌席萬象曉歸仁壽鏡煙開鼇背千尋碧松栢亂巖口



高林掛青霓巨鼇之狀分若茲坐東一望無端倪山  
開曠望旋平陸嶺樹重遮千里目石泉淙淙若風雨  
蒼池萬頃漫坤軸何處依空駭綠紛紅思假翼兮鸞  
鳳罪微陰壑兮氣騰虹山隨匹馬行看暮醉裏欲尋  
騎馬路仙都雖畫亦難書笑拈霜管題詩句 陳韶  
湘跨鼇山詩跨鼇絕頂摩蒼穹今我遨遊天大風風  
吹兩腋生羽翼飄飄直到蓬萊宮憑虛眺望眼洞廓  
巒阜上與層雲通手捫星斗俯沙界但見日氣蒸晴  
虹丹崖翠嶂金碧絢擲下萬朶青芙蓉天生名山著

仁壽縣志

卷一

輿地志

八

名輩恨無樽酒招仙童爾朱真人渺何處跨虬一去  
丹鼎空飛泉半月漱鳴玉澄潭一鏡磨青銅拂衣天  
際忽浩嘆荒林老樹驚冥鴻 舊以飛泉山爲跨鼇  
山凡賦跨鼇山詩皆飛泉也以其題名跨鼇附此  
飛泉山隋仁壽元年獠叛百姓避難山頂有飛泉湧出  
獠平泉洞因名飛泉山

文與可詩東城兀高峰爽氣浮翠微霞光射巖壁中  
有寒泉飛

翳嘶山山麓雷月峰



王爾鑑翳嘶山詩仰止危峰摩素秋牽藤直上碧雲  
頭清風聲撼翳嘶樹曉日光迎孚祝樓千古英靈欽  
漢室三隅嵐翠擁隆州憑高一快登臨興無限溪山  
總入眸 李元翳嘶山詩不到此山千載餘將軍祠  
廟翳嘶墟擁斯南下婆支北一勺清泉養井魚 劉

錫申翳嘶山詩翳嘶開南嶂山有南康祠樓閣縹緲  
間古木相參差入夏滴濃翠蟬鳴無已時可望不可  
卽夢寐若見之 又環邑多奇峰雷峰最清妙上有文

昌祠下爲宣聖廟古柏蔭丹堊四時皆夕照何日濯

仁壽縣志

卷一

輿地志

九

塵纓重訪三泉竅

原注雷月峯  
下有三泉

鄭彬倫詩我愛雷

月峰道旁無荆棘古柏十餘株夕照明翠色尼父山  
之巔文昌於其側卽此是杏壇其門入不得 陳韶

翁九日登翳嘶山詩踏殘蒼靄步清虛自到峰頭屐  
齒徐入眼秋山一幅畫驚心寒雁數行書微霜著樹  
紅於染遠水橫田綠正疎倚遍闌干人不識淡烟繚  
繞竹樓居 又晚風微起夕陽收野鶴閑雲任去畱古  
樹亂遮山外塔荒城微露水邊樓引人歸思無多里  
老我華年又一秋極目蓬瀛何處是蒼茫九日賦斯



遊 陳韶湘翳嘶山詩天風吹我衣路入春山頂拂  
袖步前林空翠濕一嶺破龜長莓苔廢鐘結瘤癭鳥  
雀泉流雜藤蘿雲氣冷况乃俯晴空不盡媚清景天  
水無端倪竹樹皆倒影荒城碧嶺圍曠野青岩迥愛  
茲邱壑奇獨得塵勞屏長嘯意自閒高歌趣已領棲  
心寡所營花落招提境

封門山在治北十里兩山對峙如門

石矩山在治北十里石壁如城一名石城山可望峩今  
名平頂山險巖四周頂平可三十畝與簡州石城山相  
仁壽縣志 卷一 輿地志 十  
距數百里皆分棟山支脈蜿蜒達於威榮富瀘

劉錫申石城山詩石城距我家相去約三里城下眾  
峯環城上平如砥翠柏似旗幢古刹凌雲起待漏憶  
家山鐘聲儼在耳

四面山在治北二十五里石萬寺後高起如轎頂特雄  
秀右削崖左陡坡

楊家大山在治北三十里蒼蒼莽莽而來右開分水鋪  
一帶山至龍居場盡

馬鞍山在治北七十里相連二峯一天峩山一秧雞山



高峙雲表巋然獨尊左開文公菴一帶淺山山下一里  
土阜曰眠牛山皆以形似名

二峩山在治北八十里去老君場五里

金龜山在治北百一十里牛角砦出脉過峽處陡一峯  
蒼然孤秀

金華山在治北百一十里藉田舖東秀麗特高左卧龍  
山

高樓山在治北百一十里藉田舖西十里金鈴口羣山  
左右擁簇中一山特出如樓狀高數仞後一巨石如飛

仁壽縣志

卷一

輿地志

十一

鵝

印山在治東北一里

唱車山在治東北二十里近鹽井聞推車歌聲因名

貴平山在治東北二十三里從簡州平泉縣及益州廣  
都縣界迤邐入縣

將軍山在治東北七十里山頂皆石形如將軍右有大  
石如虎左有大石如龍

油灌頂山在治西北清水舖東油出石縫供山寺燈後  
損竭



丹沙山在治西北廢籍縣南七里山出赤土卽今紅土  
埂

木梓山在治西北廢籍縣北六十里

金龜山在古佛寺山如龜

蛇頭山在古佛寺側河有山如蛇頭間出天然水口

包山在治西十里羣峯之中包一小山如螺

天池山在治西十五里高數百丈又名本院山枝分山  
玉屏山在治西二十里四山環聚玉屏爲之冠

劉錫申玉屏山詩玉屏清且幽積翠堪入畫倏忽變

仁壽縣志

卷一

輿地志

三

陰晴雲光此靈怪樵牧習見之忘是神仙界何日挂  
桃枝償此行腳債

金盆山在治西六十里白壩寺山如仰卧左右手垂綿  
亘數里而斷中如腹微低平坦濶長二三畝許接眉陽  
界

大方山在治西爲諸山冠亂峯中端聳不羣遠望如濃  
雲半壁山麓周環五峯曰五峯山

筮山在治西南五里

鼎鼻山在治西南隆然特起亦曰隆山隋改陵州爲隆



山郡本此

石人山在治西南四十五里一山橫聳脊特低似馬鞍石立脊間高丈許形如人

覺山在治南三十里有異光晴霽則見

祈雨山在治南三十五里甚聳峭旱禱雨處

龍會山在治南四十里巋然獨尊四山環拱有雲飛繞立雨旱禱亦應

儒社山在治南四十里今父子寺

陳韶翁儒社山詩杖策山之阿幽徑入叢樹聽鳥疑

仁壽縣志

卷一

輿地志

三

相語窺天若初曙孤僧聳肩迎邀我琴臺步行屐印  
莓苔掘衣避花露登樓倚石坐笑談隨境悟柵樹欹  
高簷蒼然日色暮尋碑愜儒想鳴琴破禪誤去住難  
爲懷寒烟鎖歸路

第一山在治南五十里

扎營山在治南五十里鎮場南高聳周遭皆石削如壁  
明末避寇此盡被殺國初髑髏滿山麓

芋芝山在治南五十里山麓多怪石

靈芝山在治南五十里半面削崖上土巒叢林綠雲周



遮不知去場街纔咫尺許

陳韶翁詩未到幽棲處延眸爽到心磬聲山外永雲  
氣樹間深小路風沙淨長垣露草陰寺門空自廠破  
曉一飛禽

龜山在治南五十里形似龜下有小溪二橋相連如環  
上石洞

石虎山在治南五十里一石負嵎如虎狀

來鳳山在治南五十五里峰巒秀傑狀如飛鳳其巔有  
石人犬各一

仁壽縣志

卷一

輿地志

十四

油碾山在治南六十里上有風洞下有鳴潭別有七山  
聯絡其一半圓如月然

八洞山在治南六十五里石巖四周洞竅八啓

鶴雲山在治南七十里一名鶴形山

陳韶翁詩招提高據山之半碧瓦朱甍插雲漢空階  
百步升危梯鶴形頂上華嚴觀左翼橫將歛右臂長  
自舒昂頭拳足九臯餘眾峯羅列皆伏雛羽衣仙人  
在虛無餐霞吐霧輕肌膚瑤台瓊榭凌丹邱青鳥時  
鳴箏笛幽平地垣墉倚絕壁俯瞰下界如登樓西村



茅店烟火稠風回南澗開平陬長河一綫日東注夕  
陽明滅沉西流乘間杖策訪崇阿眼底形勝歸吟哦  
風動浮雲忽變滅石蟠孤鶴無銷磨古來萬事率真  
宰人生不樂當奈何

豹子山在治南八十里上有飛來石如豹形餘山回環  
紆曲不絕

楊希淦詩誰擲蓮花下碧空雲根忽漫與天通四圍  
峭削疑無路對面回環不度風抱犢幾家招隱士乘  
鸞何處訪仙翁塵勞八萬難拋却回首重瞻去又匆

仁壽縣志

卷一

輿地志

五

真武山在治南八十里形如真武像打坐  
佛耳山在治南八十里山麓刻古佛故名  
陡尖山在治南八十里

陳韶翁詩高巖俯危磴深谷留轍跡纖細眾松青崕  
岬雙岸碧低澗臨馳驟浮梁踏險僻砥柱強支撐欹  
側防傾易八月走洪濤一發萬槩釋噴薄鼉鼉怒銷  
沉沙礫積前後山束隘灘口畧洞關湍瀨爭急瀉呼  
吸雜亂石我來適初夏清淺但盈尺倒影卧殘碑字  
痕若可繹徘徊洗我心淡然相與適鯤鵬拔滄溟顧



盼風雨夕

石獅山在治南百里屹立數十丈酷似獅

飛鳳山在治南百一十里勢飛舞疑鳳翔雲烟繚繞其上則雨

奈不何山在治南九十里七里溝忽若無路一山嘴屹然而立攀藤越險上俯視周迴削壁尋來徑轉巖危處倒難下輒喚奈何

龜山在龜溪雙碑石下一山釜伏如龜隔溪望之頭介宛然

仁壽縣志

卷一

輿地志

六

烟山在治南百一十里自周家坡而來特起大小兩峯高數十餘丈四望三五十里傑然秀出

九節龍山在治南松場東小煙山下二節大煙山下七節隔溪連屬極起伏斷接之妙山盡礦石錯落如鱗甲不啻游龍俗呼九節龍

學山在治南百一十里有筆架石馬諸山爲屏皆秀出一石鎮山方且平不啻印

圭山在治南百十五里靈龜石尾石氣將盡突一峯望之雲端邊坡邊巖巔平而方橫如圭截然而止故兩方



石鋪面若斷若連以爲席坐可十數人土人曰尖山分水左歸資州右歸嘉定相距各百八十里

息壤山在治南百二十里汪場一里許圭山下石氣脫盡跌起隆然一大土巒上二丈餘黃壤濡不可踏長竿插其下梢且沒爲息壤山前開霍山兩母後曳林坪一帶疎巒逆捲隨山東來一水而西

船山在治南百二十里四山環列中低橫一山里長兩邊懸巖下小溝前平田一芙池山如船浮水面卽汪場霍山在治南百二十里汪場東柏均透迤十數里至罈里祿加場正枝趨石金岡至北斗鎮交牙牛角砦東下簡州山餘氣爲縣東南一大局結束

獅象山在迴龍場西十里一溪間左巖如獅右嶺如象皆石高三四十丈屹然水口

墨屏山在治南百四十里五皇廟兩溪交會四山開陽一座屏風雲表黝然而黑其峻削可五六十丈上無土純石平橫如一字濶十餘丈有古池二瀦水山半兩隅分張對峙皆卓立土坡上右隅生成石門一險徑上及



頂無梯半鑿小孔手攀或緣藤蘿

道光癸卯六月李惺遊此曰仁壽多奇山此爲獨絕

凡若墨屏山詩突兀蒼巖石蔽天三水匯流清且連  
若有人兮住其間風搖翠竹陰籠田寂寞山館溪之  
灣開門一幅畫屏懸松濤落子響琤然嵐光飛掛屋  
簷端我昔從之相往還夕臨沙渚朝峯巔魚鳥依依  
悅心顏於今故人何處邊探去幽佳已三年後來長  
者乃追攀叫絕風景如斯難異哉就過而問焉一師  
一友來周觀詳姪瀾師孔濂清高無比兩詩仙道隔  
千里誰作緣無乃爲我情意偏到今過此獨盤桓回  
首停雲  
摧心肝

兩母山在治南百五十里雙峯插天四面壁削諸峯羅  
列其下如兒孫大母山半有泉石縫出頂如盤平潤不

仁壽縣志

卷一

輿地志

六

逾百丈有三井泉常有餘一小徑可上小母山險巖彌  
劇無徑上

凡若兩母山詩壓盡陵州百萬峯歸然兩母在雲中  
砦餘高頂兒同列梯斷同懷客不通一樣平盤山大  
小半空橫亘水西東梅花脚  
踏雞冠起又見巖然滿豔紅

老山在治南百五十里縣山正榦自北而南而西而東  
至汪場至馬頸坳又東而南逶迤數百里大作勢每疊  
嶂危峰突兀天際蒼翠爭奇至櫃巖曳轉一帶巉岈怪  
狀醜形悉虎氣黝如墨不啻削壁危牆皆曰老山

凡若由五皇廟趨列乘墩遂到雞冠石上觀音崖下  
盤家溝四望諸山不可名狀作長歌一章開歲二日



天放晴駕風鞭霆四山行登頓周迴百里外看盡雲  
走風連萬嶙嶒一路鳥道高下虎石縱橫有時肩輿  
欲行行不得呼我捫蘿踐草相攀登只見燈杆錯樹  
蓮座穿藤云是駒光不到人跡稀徑或多蟲蛇惡物  
蟄藏不可測恃此作鎮山之靈怪或一下心陡甯掉  
頭回顧又怦怦贏得兩袖嵐煙一襟棘荆且住排石  
鋪衣憇坐記取好山一象分明不見喜者顏破怒  
者牙撐頭者占黛妍者空青圓者佛頭低昂瘦者仙  
掌瓏玲整齊者畫屏几旗鼓之排列光怪者圭壁劍戟  
之晶瑩異哉入畫吳道子之記在心空翠謝靈運之  
難強名又如蛇退嶺馬奔營虎出柙獅搖鈴象撲鼻  
鳥張翎雄雞之冠嵯峨老龍之鱗兀騰漲天之水浪  
湧燎原之火燄生而我生長深山裏從未見此莽莽  
蒼蒼怪怪奇奇之勢與形母乃蓬島之山幻三神秦  
蜀之嶺開五丁今故遊於其間一任合沓壯觀縹緲  
移情更有高高山頂修且坳昔年相避難今日相歸  
耕我欲歷覽極目遊情哉脚力已不勝歌且  
成此山起自芙蓉城透迤而來故頓停忽然作勢起  
此不平

仁壽縣志

卷一

輿地志

九

兩母乃如此乎磅礪鬱塞凌空冥愚公移不得秦皇  
鞭不能如何如何此崢嶸信是大塊產不平吁嗟乎  
大塊何產

皮鼓山在治南百六十里查場上兩峯秃頭高出四山

中數十里外望之如在天際

仙人山在治東南九十里絕頂一石鼓有巨人足跡

麗甘山在治東二十里昔有十二玉女於此服鹹泉女

既美麗泉亦甘好故名

翠屏山在治東二十里望如屏列

佛巖山在治東二十里



古樓山在治東二十五里圓如鼓東南望重疊如樓  
甘棠山在治東三十五里

架衣山在治東四十里甚巉峻頂平如砥俯視諸山  
瑞雲山在治東四十里山土阜不甚高

馬蹄山在治東四十里有石印馬蹄四跡

半月山在治東四十里晴久白光一縷從山中起必雨  
雨久將晴亦如之

解慍山在治東五十里與高瞰山對山不甚大獨高遠  
望無障風常灑灑然來山腰一石坪可坐十餘人曰看

仁壽縣志

卷一

輿地志

三

棋坪

雲際山在治東五十里張家橋里許孤峰聳翠

望雲山在治東七十里舊巖畔懸石若馬蹏曰馬蹏山  
自牛角砦逶迤而來頓起峯巒望之獅蹲虎踞旁一方

山曰書臺前有嘴諸峯羅列共呼文佳大人溝居其左  
李白堰繞其右

劉元望雲山詩玉泉庵外一峯橫鎖住江流不斷聲  
雨後夕陽秋後雨漆來嵐氣十分清

鐵山在治東七十里蜀漢宇文度爲鐵山侯以此



象鼻山在治東七十里週圍二里許多石且白色獨橫  
卧平壤春夏間菁茅蔚然遠近望之象形宛具

鳳翔山在治東何家場南抵威界山突兀重霄似鳳翔  
昂首覽德輝而下頂際泉流莫解發源何處與兩母山

遙相峙

彭貴山在治東九十二里彭貴獠姓

金耀山在治東百里北斗鎮南峻甲諸峯前帶蘭溪右  
控小澗四面奇峯環拱競秀爭妍

大壁山在治東百里蘭溪近資中天池山遙見之高數

仁壽縣志

卷一

輿地志

三

十仞大壁適當其中巉巖峭壁古葛寒藤其巔平原寬  
逾十畝有廬舍田園桑麻鷄犬之盛皆入雲中前獅子  
岩凌雲洞環大壁立至遙瞻寨子天池法輪大佛朗列  
目前

龍巖在治北五里鑄石爲龍卧巖下

好天巖在治北三十里倒石山

滴水巖在治西十里巖若唇出泉穴若喉下小池若盤  
清澄久旱不涸霖不溢盤外數十丈瀑布石笋如林清

越之聲時聞



手扒巖在治南六十里交井研界險有數里兩邊懸巖  
庚申擒賊目李遇齋處

飛鳳巖在治南六十里四壁峭立巖頭一石特起如鳳  
飛

八兒巖在治南古樓溝上一在馬鞍山

碧巖在治南鴻古塘下

黑巖在治南祿加場

紅巖在治南瓦子坳

白巖在治南百十五里白石矩山西南經涼風坳來上

仁壽縣志

卷一

輿地志

三

土田平濶而長畧小巖左鄭壩魏坪右劉田濫河多平  
地洞消水日氣洞自生松柏堅於他處礦石錯落如鱗  
可爲灰右沿邊巖下穿空

凡若白巖詩迷茫草徑幾人行絕好陂田陡且平冷  
廟雲封泥剩塑巉崖水吼洞空撐儘餘礦石然灰死  
不斷松林落子生三兩村烟  
雲際住不知寂寂聽禽聲

峭巖在治南夏家沱對屹二山形如二犬

獅巖在治南百十五里大山東去忽一斷卽撐起橫出

一峯戴石嵯峨光怪如獅子蹲跌下土阜無數皆秀大

山倒圍屏其後左右小溪皆逆回



貓兒巖在治南百二十里鳳台山麓巖高數仞頗壁削有潤痕宛然望之一虎子露睛豎尾而踞呼之曰貓兒下陰深溝

普陀巖在高岩觀音閣下臨萬仞最危巖

石笋巖在治南百五十里老山中挺然一石瘦削以長如笋亦曰筆鋒

櫃巖在治南百五十里山自馬頸坳束氣頸一瘦石如笋連起數小巖特作勢爲櫃巖橫濶一二十里遠望如漲天水左出大幹下兩母山鷄冠石開瀘內榮威諸山

仁壽縣志

卷一

輿地志

三

右分小幹下高岩雷岩曾岩櫃巖後爲向岩石笋巖岩由鷄冠石至分水嶺分數小幹回開查場碗廠迴龍場一帶山縣南亂岫危峰橫匝百里交榮威井資界櫃巖實爲山祖

馬頭嘴在治北七十里自夫子巖來忽大跌斷又一過峽陡然起立危巖如削壁不啻千尺高上戴一峯秀極白象嘴在治北黃龍溪江左有三獅山如拜

釣魚嘴在治北百四十里蘇馬頭下里許山高數仞橫截府河望若釣台大江流繞三面右上數里華屬鉄椿



堰山左下數里華屬迴龍寺下山三山交錯爲省垣門戶

鷄公嘴在治北百四十里蘇馬頭南由五岔路蜿蜒而至如鷄嘴左右送山秀麗左對山方如玉屏

燕嘴在治南百十五里黃連坳長十餘里平衍無礦石膏腴獨別

翔鳳嘴在治南百三十五里李白渡黑林口上一溪曲折之玄一山嘴橫亘人徑疑絕內左向砦右雷砦中高砦風景幽佳恍似武陵桃源

仁壽縣志

卷一

輿地志

三

終嘴在治南百四十里向山尾瘦削不一丈高二丈餘皆石三四層巖上

汪家嘴在治南百四十里山自列乘墩嶺率而西至嘴巋然而止爲馬頭巖兩峯斷續秀絕一隅左右兩溪開陽外四面蒼山恍惚武陵風景

金龜嘴在治東周龍場西十里大溝水分流中一山形如龜

龍飛峽在治北牛角砦前一大跌斷間平田千畝舊有九井十八洞塞兩邊大石巖壁立



石扛坳在治南八十五里涂場北大石十數堆錯落如星點棋子光怪而黑上蕭疎數松

李惺癸卯過此曰望之一幅畫圖恍惚桂林風景平  
中一突

鐵石坳在治南九十五里坳一磊落大石黯如鐵緣邊乃巷無鑿痕濶深丈許下而上皆古徑牛負炭不斷

金錢坳在治南百二十里石山大斷續間

陳韶湘金錢坳詩鷺鷥白於霜飛點松枝上我行過  
松陰雲氣擁屏嶂山高日上遲半嶺蕎花放花骹本

仁壽縣志

卷一

輿地志

三

殊姿硃礮石異狀曉晴烟霧深隔隕聞樵唱

凡若金錢

坳左達寶珠溪右上下七八十里詩磅礮扶輿鬱塞偏寶珠一帶上金錢龍鱗滿地皆頑石鳥路行人不斷烟水走陰河瞞夾岸山攢小洞戴平田不知奇氣鍾何處鐘乳磷磷搏土前

柏樹坳在治南百二十里縣龍行幾百里頗帶石至坳大脫秀生汪場無數土阜周圍十幾里外列嶂重重如

畫

李嘉秀遊此曰恍惚南邊

高草墩在治西五里山有一峯孤聳高六十餘丈頂如盤望之草樹然



列乘墩在治南百五十里方平一峯出雲表四圍削石  
右一長石丈餘跨澗下一石龜  
南陽嶺在魏坪東橫亘二十餘里上小巒  
小葱嶺在治南百五里燕壻蓮花兩山盡處一嶺橫亘  
勝黏連中一溪由羅廟左逆山大幹倒流十餘里無出  
路一折而繞蓮花寺前靈龜廟側順燕壻流十里葱嶺  
堵如牆立穿洞爲溪水口高七尺八尺兩丈許寬徑一里  
出口頗窄而低竟抵漏洞河河水落洞汨汨流聲可辨  
但漲不見出水只河心浪湧數尺高正洞處

仁壽縣志

卷一

輿地志

美

鵝公嶺在雷砦右巖際陡削一嶺高數十丈實山嘴通  
樵子可上不可下險絕鳥道

鷄公嶺在仁威界分水嶺八里上石長三四丈昂聳  
挺出類雄鷄伸頸狀甚奇氣

鐵門坎在治南百五十里山坳高聳一石薄削而長可  
二丈餘如門限半里石峯突起簇簇如鷄冠頂寬一丈  
長二倍有池深廣三尺餘不竭下五山環列如梅花  
土地坎在治北三十里由分水舖緣崖際陡坎稍平一  
折聯陞坡計頂至麓五里



聯陞坡在治北三十里通縣省大道本山徑欹側楊桂林槐林田學祿劉陞典鳩工啟剔不啻康莊爲縣北門重隘口

赤土坡在治西十里大山橫亘中一徑兩壁截然

閻王塢在治南百三十里開元寺左塢濶長俯一溝水如線險絕

楊應達閻王塢詩路過閻王塢重來倍覺艱石橫長占地樹密欲藏山壁立岡千仞溪回水幾灣高齋何處是指點白雲間

仁壽縣志

卷一

輿地志

七

雲將台在治南百十五里周遭峭絕高十餘丈上廣極容二三百人雲遊

青獅台在治南百六十里形酷肖獅

棲鳳岡在治北五十三里蒼翠欲飛若鳳秀甲諸峯後山曰鳳笛可望百里風過如鳳笛聲

石坎梯在治西五里一山鑿破如門巷丈寬而高四五丈壁削開張入亂山如麻紛雲氣回眺東南一帶空濶嫩巒萬點隱隱如浮波面

程佩箴石坎梯詩鸞環鳥道逼蒼穹斧劈天門一線



通山外晴明山內雨不知身在亂雲中

石橋谷在治西高店子下一路夾道依山傍水十餘里  
滇賊經此谷出曰方有生氣

大石板在治西四十五里山險峻絕滇賊過一農夫執  
農器立險處竟不敢犯

水屬

龍水源出治北五里巖半一泉口碗大廟龕其上拂拂  
而出為龍水一里龍王溝由北門入城穿南門出為蟠  
溪又東北經白家壩受回龍橋水又東受響水灘水又

仁壽縣志

卷一

輿地志

三

東受朱家橋水又東至游子寺受婆支水又北至宋家  
庵受馬溪水又東至辜家壩受綠水又東南至孫家壩  
受通江水又東至清水寺受清江水又東北白土鎮今名

北斗鎮

為蘭溪又東經資州四眼橋至王爾溪入沱江

婆支水在治北八十里源出婆支山即牛角寨水分左  
右流左絳水東北流經高家場至三岔壩入簡州界至  
簡北關外入雁江右西南流則婆支水經徐家溝至奧  
林溪流始大又經鰲林場過曹家堰牟尼寺至黑爾壩  
合紅巖溪又十五里經馳家河雙河口合滑石溪水又



東二十里至游子寺右入龍水

通江水在治南八十里源出井研蠶泥溝西北流八十里土橋壩入縣界東流經針匠店古匡橋通江橋爲通江水又東北流爲偏壩河又東北經順江場李家壩高河礮謝庵寺孫家壩入龍水

清江水在治東八十里源出縣南涼風坳東流經鄭家壩龜溪河鐵牛壩受魏坪紅巖溝水至張家場汪家壩石板灘受黃連橋白崖古井水下流爲清江河又東經通草壩觀音灘顧家沱至寶珠場爲寶珠溪又東經呂

仁壽縣志

卷一

輿地志

五

公橋矮子橋黃家橋斗尖子官祿灘甦家灘大橋入洞橋毛享灘高橋觀音灘玉龍場中灘老龍橋清水寺下合龍水婆支水通江水四水滙於崇柏巖大沱過旱五里至北斗鎮場又十里至車槽邱下資州界四眼橋入溪場入沱江

綠水在治東北八十里距廢貴平縣三十步發源簡州東山谷中至鎮金橋入縣界十五里經貴平舊治又六十里至享家壩龍橋入龍水

蟠溪水在治東四十里馬蹏瑞雲兩山間龍水與婆支



水滙處

蘭溪水在治東南百里北斗鎮下

劉錫申蘭溪詩蘭溪不產蘭掬水參蘭臭水清見魚  
苗灑然秋氣透伊昔釣遊時手弄縠紋縐而今飽風  
塵安得枕石漱

紅巖溪水源出治北夫子巖馬跑泉南流經太清觀文  
公庵高橋鎮合興隆場水東經黑爾壩入婆支水計源  
流四十里

滑石水源出縣北五十里尖峰山東流經大滑石場小

仁壽縣志

卷一

輿地志

三

滑石場距治三十里過雙河口朱家橋距治二十里至  
白家壩入龍水計源流五十里

三溪鎮水在治東三十里三江水合一發源中壩井歷  
飛佛坪爲中派一發源天井溝歷仙女灘會於右一發  
源秦家廟歷葉古封會於左

老蠻灘水收觀音寺劉大人溝夏家溝女仙溝乾古井  
楊家溝賈家河六水下宋家橋合龍水

姚河水在治南六十里源出鎮子場扎營山南流約十  
里與龍馬山水合西流經天生橋而南爲朱家橋又西



南經熊家橋徐洪壩又東南經饒家河至雙河嘴與張家場黃連水合經鐵牛壩入清江水

漏洞水在治南百里山氣鬱塞有水各歸一洞洞如罈口儘消受水暗流其下數十里有數十洞盡滙一處流出爲漏洞河外無源水洞出遂成河入寶珠溪

鯉水在治南百二十里祿加場源出葫蘆背濫泥溝西流經鍾潭曹壩周梁棟茶店子打磨灘新澤河六皇溝新橋銅鼓灘四十餘里勢甚曲入雙河口會寶珠溪水經呂公橋而西

仁壽縣志

卷一

輿地志

三

錦江水岷江正派在治西北百里自華陽縣芋頭藪

河西

交界起五里菩薩巖

河東仁壽西華陽

十里蘇馬頭

街半仁壽半華陽

十五里奉國寺

河東仁壽西華陽

五里滑石灘五里金祥寺卽

紅花場五里古佛洞一里道士溪五里嘉禾莊以下與彭山縣東西分界江以東皆縣境

赤水源出簡州山谷西南自土主廟入界經洪湘寺新橋至藉田鋪西南合倒流水北合鹿溪水趨黃龍溪入錦江江清溪濁直入江心故名赤水

倒流水源出馬鞍山至清水鋪受小藍橋水北流經東



瓜沱石膏舖三里漫觀音堂左轉至藉田舖西合赤水入錦江

鹿溪水源出簡州龍泉驛南流入縣界經煎茶溪西經石滾河石家壩至兩河口下魚箭灘與倒流水赤水滙藉田舖玉帶三條水卽此十里黃龍溪入錦江

木津水在治北廢籍縣南五里源出木梓山廢籍縣六  
十里

魚虵水在廢籍縣南三十五里源出楊家大山南至太乙壩受楊柳場水經梅橋舖貫壩場至黑龍灘受陰晴

仁壽縣志

卷一

輿地志

三

溪水又南受倒石橋水右轉經金甲灘龍居場至雙河口受大石板河水蜿蜒由譚家壩入眉州界注錦江此水有魚如虵

陰晴水在治北十五里源出治北高家溝經蔭德橋南流至黑龍灘入魚虵水

陳韶湘陰晴溝詩路入陰晴溝榮紆將百轉上山復下山輿夫氣不展荒村野店貧小溪春水淺岡巒高刺天緣崖卻可踐朦朧曉霧浮隨風競飄卷回首平頂寺蒼蒼猶在眼隔嶺聞鐘聲峯頭一旅館



天池山水在治西十里源出魏家溝經天池下合板廠溝入黑龍灘合魚蛇水

毛坡水在治西十五里源出玉頂山經虞家場後毛家坡三倒拐黎家山高店子灤洞橫山北辰兩峯間入倒石橋江會魚蛇水

毘迦寺水在治西二十里源出挖斷山經毘迦寺大佛巖聖泉寺大龍橋湧泉寺合兩河口閔家溝倪家壩獅子山李家壩雙河口入鯽江

楊家廟水在治西三十里源出五顯場後經楊家廟宋仁壽縣志

卷一

輿地志

三

家溝觀音巖九間房側耳巖石牛柵合兩河口湧泉寺下跳磴子入鯽江

大石板水在治西四十里源出楊柳溝經大石板穿洞子蔣家林規水壩諶溪溝馬槽口虎頭巖厲家壩龍居場雙河口入鯽江

彭巖水在治西五十里源出紅豆了經彭家崖蒙古塘崔家堰大亂石玉台寺猴子崖樓房灣合河壩場錦江水入青神界

紅巖子水在治西六十里源出謝家廟抵井研經紅巖



子蕭家山西賢寺千佛巖會河壩場錦江水入青神界  
官渡水源出威遠縣北分水嶺南流自曹家溝經查家  
場積福場五皇廟碗廠平灘高灘劉田壩下流爲官渡  
河經和尚崖江口河廖家壩迴龍場龔家壩劉家壩又  
南曰牛砦三陽溝水又南石牛山韋家溝水又南柴家  
山皮家溝水俱大車堰上流會官渡河水下流爲擁斯  
茫水經乾柏樹入錦江

碗廠水卽放生河源出威遠分水嶺曹家溝查家場三  
十里受楊家溝鄧家溝濫泥溝扒巖溝四水流漸大爲  
放生河兩里間三沱放生河諸山來會迷水出路收盡  
縱橫五六十里山水爲一大水口下流滙李白渡水入  
官渡河

仁壽縣志

卷一

輿地志

三

凡若放生河記余嘗著並生摭餘一卷未云物吾與  
也抑息殺機一道咸豐末滇匪亂蜀三竄縣旣定又  
聞髮逆其來於是碗廠有放生河上自熊沱中歷桓  
沱下至廣生沱長五里許沱處深如不測昔者自樂  
天有放生儀真西山有不殺誠顏魯公隨守縣郡立  
放生池八十一所咸乞御示蘇東坡晚年極喜放生  
在杭州奏修西湖續放生池張玉書曰數公節義文  
章千古使事可緩其肯爲乎碗廠滇匪再過居人卒  
脫於難物亦樂生山水窟陰隲文曰放生覺世經曰  
放生吁嗟乎人不殺物天不殺人周濂溪曰與自家  
生意一般善哉此河於是磨崖書曰放生  
河凡捕魚者禁焉爲後來告同治二年記



李白渡水源出東溝馬頸切貓兒巖三溪又南櫃巖溝

盤溝橫溝魯溝數溪至李白渡漚流又西南汪場霜橋

小溪至平灘漚李白渡水下流官渡河

凡若李白渡趨盤家溝詩高秋天澹蕩夙駕道幽清  
野店橫橋小山田落澗平白泉流石氣碧篠嘯風聲  
可有漁人至窮源別寄情又積陰無午照空翠自深  
秋夾岸分峯立橫溪截路流樵呼煙曳鳥鈴語炭馱  
牛也道康莊好肩輿任客遊又一路鳴蟬接長流引  
我前窮簷巖壓矮缺谷竹羅圓炭盡閒山洞雲多護  
水田猶聞藍靚美資養過荒年癸亥詩六月李白  
渡清流俄濁流我來漲以退溺者去悠悠旁有隱君  
子墓碣不名留空谷故依然入口生翠幽溪聲吹風  
來有鴨閑一鷗便轉黑林口竹籠塗人由可以息肩  
輿奔忙炭翁牛輿夫汗如雨徒步行遊還過四五  
橋天險在上頭君看了反菴嘗有紫煙浮 甲子詩

仁壽縣志

卷一

輿地志

三

聽雨乘風踏短橋春光老處翠勻描山溪水走雲分  
合石路煤馱日暮朝懸溜飛簷垂架屋寒濤吼樹動  
鳴條此中人隱無名  
氏去去騎牛學且謠

落陽水從陵州始建縣界南流入旭川縣

獨孤水從陵州始建縣界流入威遠縣又南流過公井

縣界出瀘州富義縣界

四望水在平羌縣東南六十里源出陵州仁壽縣經平

羌縣界入江

榮溪水一名榮川古遯水自仁壽縣流入又東南與雙

溪合又東南流入富順縣合金川又東經江陽方山下



入江

凡若注縣水一東流以婆支水綠水龍水通江水清  
江水為大外羅泉水為大一西流近北以鹿溪水赤  
水倒流水魚蛇水陰晴水為大  
近南以官渡水擁斯茫水為大

龍泉在治西南二里旱老人禱大雷雨泉隨湧出故名  
郭其釗詩望峩大山麓疊嶂有泉動涓涓不絕流陳  
蹟傳龍洞老龍却非幻靈泉千載用應禱沛甘霖澤  
被萬人眾仄徑歷崎嶇屐齒未敢縱

聖泉在治南七里泉碧愈瘡墮孕胎變銀色

大壩山後泉在治南二十里源出玉京山經觀音灘砌

仁壽縣志

卷一

輿地志

三

石寨中流為堰水循山左流出溉田五百餘畝

石虎山泉在治南常不涸溉山田數十畝

祈雨山泉在治南溉田十數畝

滷泉在治南九十里涂場滴水溝崖半滷泉仰出清氣

沁人僅井窩容三石許雨甚不漲旱甚不涸

金錢壩泉在治南百一十里坳如峽口左丈巖際泉噴

出不止有浪花鳴如金聲由陰地溝山如一大蕩四匝

巖無溝陰穿山腹四里達坳巖口出漑田數十畝無旱

憂



茶園洞泉在汪場西十里泉自洞出流爲溪三里圍壩  
礦石磷磷小嶼交錯水數曲下高壩原木溝入寶珠溪  
清江  
靈龜泉在汪家場北不盈尺水龜石背上蕩如盤常盈  
盈然

涼洞泉在治南百二十里去官渡河三里洞不斷泉流  
出旱未涸灌田二百餘畝

白巖泉在治南百二十里白巖寺下泉自洞湧半坡流  
泛爲濫河壩灌田幾百畝只患潦從不知旱

仁壽縣志

卷一

輿地志

三

罈口泉在治南百八十里大沙壩一溪中突石圓口如  
罈濶二丈餘深不測噴水下流六里倒石橋滙大車堰  
官渡河同治四年大旱河斷流罈口溪獨水有餘灌溪  
一帶田幾百畝

福泉在治東十五里郝家溝山下出泉甚巨灌田百餘  
畝丁巳大旱源混混不竭獨豐年

麗甘泉在治東四十里戴寺橋卽聶山甘泉故鹽井

馬跑泉在治東七十里老君場山谷中泉出深洞碗大

口濺若跳珠洶洶作鞞鞞聲



智泉在富場下謝壩小溪畔泉小則雨大則晴久旱愈漲汨汨然出可溉田百餘畝

石泉在藉田品山下冬夏不涸暗流之聲若操琴可灌田十數畝

石峽泉柳溪左岸峽削而曲約里許下清泉滴滴經冬與旱不涸

煎茶溪泉中溪獨美以煎茶浮起碗面二三分不溢解厄泉在架衣山深廣尺許可愈疾

一碗泉在楊柳場東一寶珠場東南水止一碗不涸不溢

仁壽縣志

卷一

輿地志

三

太極泉在涂場南凉水井一溪水穿壩出圓折如旋視之兩邊大山餘氣不逾丈土埂宛轉交互水過如太極圖然

龍眼沱在治北百里逆流水中近息壤池半里許旱水彌沸溉田數百畝

老人沱在治北鹿溪沱長半里而深中有泉源灌謝壩田數百畝獻賊屠縣有謝老人潛沱中數日間出頭水面一呼吸賊去孑然獨存遂以老人名沱



安樂沱在治南四十八里上下相距數十丈深莫測上沱巨鼈伏踞見則雨今淤有泉湧下如故

觀音沱在治南九十里涂場西北十里最深長一里以灌田從未竭

斯釐沱在治南百二十五里鎮江上灘如梁下深數十丈汪洋渟澄旁巖伏洞不可見旱車其水半大魚鼈出天大雨

顧家沱在治南九十里上灘一石橫斷流下里許爲沱故不流判作雙盤渦勢回旋不斷浪花僅一水經脈由

仁壽縣志

卷一輿地志

三

中流大異

雙河橋沱在治東二十里兩水滙渟方廣一畝沙淤兆豐年大水沖決必歟

崇柏沱

古名松柏淵

在治東早五里上濶甚深二十五六丈

爲諸沱最邊半石巖皆伏洞

清官池在縣署小花廳夾竹桃前方廣丈餘深七八尺放生池在治東六十里安碧橋池里長上下兩灘兩邊石巖深莫測河流絕池平滿如故

羅成章詩峭壁中分瀦作淵秋光倒映蔚藍天靈波



昨夜風雷吼應有驪龍睡不眠

古放生池一在治東張家橋十里金祥橋下踏瑞橋上下入二三丈有穴做如屋皆平坦石幽深不測

放生池一在週龍場十餘里放生砦下池中三石俱大丈餘石下數孔相穿魚蝦往來池下兩巨石朋聚如橋通水處寬約一丈高四五尺許上坦平長鋪丈餘橫過溪三丈以外將上橋鑿梯五步

放生池一在黑壩河一在碗廠東崖古大深塘

鴨子池在治東九十里從簡州三叉壩丹景山來純土

仁壽縣志

卷一 輿地志

四

潤兩丈深四五丈中間碗大孔插竿其底不及丈泉仰而噴清冷宜人時小螺細蚌石子魚兒隨之出同治四年大旱日兩岸不能涸灌田數百畝後人故鑿石鴨池中

雙龍池在治東七十里玉龍場數里池廣畝許泉底出泥濫數處不可近鄉人禱雨所

天池在治東百里法輪寺後亂山中寬四百丈四圍石口窄腹皤深莫測擲石其中淵然有聲又名龍池東有洞與池通四旁鱗甲宛然下石如猪肝色



龍洞池在治南五十里清見底周數丈深丈許泉源在焉涓涓不絕

天池在治南百二十里松峯寺池深丈許濶倍水澄碧從未涸皆生成石

文昌池在汪家場桂香殿前池方橫七丈許縱五丈深丈中橋皆自然石略加鑿沿池橋畔兩石欄池有石筍有花有魚

觀音池在玉台寺三里濶十丈不知其深旱屛之大雨龍池在治北八十里

仁壽縣志

卷一

輿地志

里

鴛鴦池在治北五十里楊柳場西寬五畝鴛鴦飛止譚子池在治西十五里廣四五尺水澄澈如常至旱不涸積雨不加禱祝靈應亦謂天池

郭周藩詩澄水一百步世名譚子池余詰陵陽叟此池當因誰父老謂余說本郡譚叔皮開元末年中生子字阿宜墜地便能語九歲多鬚眉不飲亦不食未嘗言渴饑十五能行走快馬不能追二十入山林一去無還期父母憶念深鄉閭爲立祠大厯元年春此兒忽來歸頭冠簪鳳凰身著霓裳衣普遍拯疲俗丁



甯告親知余爲神仙官下界不可祈恐爲妖魅假不  
如旱平夷此有黃金藏鎮在茲廟基發掘散生聚可  
以救貧羸金出繼靈泉湛若清琉璃澄表符瑞水  
旱無竭時言訖辭冲虛杳靄上元微凡情留不得攀  
望眾號悲尋稟神仙誠徹廟廟開窺果獲無窮寶均  
融沾困危池源出嶺頂噴湧世間稀異境流千古終  
年福四維

奉國寺池四季不乾

息壤池在治西北廢籍縣南一里有地畝餘踏之軟動

仁壽縣志

卷一

輿地志

聖

泉六七出不涸不溢名息壤池北魚蛇水南導江水西  
丹砂山

金華池在藉田舖東巷外二里廣數十畝

罩水蕩在治南百一十里田波四溢爲溪積蕩深五丈  
餘上狹下濶可溉田數十畝旱不涸

龍潭在治南百里龍潭河側潭口不濶裏寬深莫測四  
時水不竭爲潭外河源

方潭在治西四十里范堰里許深莫測每漲山砂石下  
莫能淤



龍蕩在松峯場南十里三面窪巖泉滴如雨蕩濶三丈許深不測嘗屏之不涸溢而下流入瞿石橋

藕塘在治南五十里濶十餘畝極深底裂石左右石巖井二如龍眼後倚巖壁洞穴豁然容五六席下清泉一

泓

新塘在富加場西橫濶十四丈直十七丈深三丈五尺石砌馬頭梯二各三十餘級供一場人汲飲道光二十一年後新築

魏塘濶十餘畝兩邊橫埂會合前一小巖塞其口水出

仁壽縣志

卷一

輿地志

聖

下官渡河

龍眼塘濶十畝內一井呼龍眼巖泉錯出旱不乾

八角塘受三溝水下一溝泛出平平然四溝布八角隱

如八溝中濶極約二十餘畝

大小牛塘傍天保砦山夾港七八里

飛泉井在治東超覺寺前百許步望夜井中半月澄瑩

有飛泉半月之景

王爾鑑詩怪道飛泉映半月世間圓處常恐缺我來

泉上識盈虛一盞茶烹桂花雪 劉錫申詩東有飛



泉山上爲超覺寺中遺爾朱像載在井蛙記泉井曰  
半月可以悟世事雙榕老不材巖柱牽我意 鄭彬  
倫詩朝上飛泉山暮宿超覺寺明井月半規瑩然鑑  
不異昔聞有爾朱此焉影留二摩挲以徘徊所憾非  
洙泗

學水井在學署巖下

邵盥詩祿源文浪湧象有取於蒙修綆千家汲靈湫  
百尺通涵濡承聖澤淘洗自天工清澈無踰此從知  
養不窮 嚴廷襄詩醴泉看活水篆石紀芳名半夜

仁壽縣志

卷一

輿地志

罍

巖前溜高秋雨後聲淺涵山影靜流帶野花明挹注  
知無匱澆將洗俗塵 水署惟何有山腰活水生達  
之看疊疊息也識深深澗裏分來細藤間瀉去清尋  
源徵石刻隱約得泉名

塞水井在西關內

八角井在治北二里上石臼中泉湧出眾泉皆涸獨供  
汲

八個井在治北十里封門山前正山頂間一泉湧發爲  
井



一碗水井在治北三十里楊家大山  
眠牛山井在治北七十里牛頭一井小而清尾一井大  
而濁相距百餘丈

龍洞口井在治北寶峯寺右崖洞底中一圓井泉流清  
洽四季不斷

白馬井在治北藉田舖西南泉清冽近井田皆無旱慮  
凉水井在治南十里田壩中一井泉如盃大上噴灌田  
四五畝旱車其水八尺深愈湧出晝夜汲一分不減盈  
如故

仁壽縣志

卷一

輿地志

四

金馬井在治南一里奎閣下

滿水井在治南二十里清不涸冬類溫泉夏涼於水供  
一場百家汲飲常有餘溢而流北西二里許成河又三  
里轉經五龍山橫截山腰而過水遂大下苟家橋入通

江

凡若滿水井詩莽莽五龍山山上泉涌起日汲一千  
桶盈盈清且美便作小溪頭噴薄倒五里何哉山截  
斷穿渠南而駛滔滔之通江原來自滿始君問養不  
窮看此一井水

玉泉井觀音井在鎮場南半里相距不百弓泉脈潛通  
一深極從不涸供場數百家飲



搭巖井在治南五十里泉清而香甘有雲氣出旱禱應  
木落井在治南五十里深數丈溉田五百餘畝不竭雖  
旱如常

龍頭井在治南六十里傍山石壁上刻龍頭泉下湧四  
十五里石鼓河鑄如龍尾

白水井在治南八十里水白如雪旱年可溉田百餘畝  
白鶴井在治南八十里白鶴橋側山形如白鶴飛翔翼  
足頭尾俱全井二如雙目然

烏龜井在涂場里許最古而深泉清冽旱不涸中有旁  
仁壽縣志

卷一

輿地志

巽

小洞伏一大龜時出

古湫井在涂場東六里廟山下夏秋晴水起丈餘高溢  
而奔流灌田三百餘畝

夏家井在治南百里許泉混混旱恒溢沍寒自温暑尤  
清冽

埋古井在治南百里老鴨塘下一井濶三尺許非甃非  
鑿完然石孔故封蓋僅小罅泉出不知井也雍正初突  
漲湧幕去皆泥淘之味甘且冽不知其深日泉出下流  
爲渠入寶珠溪瀦之灌田千畝



古廟井在治南百一十里古井廟側半坡一井如甕口  
大泉涌溢旱未嘗竭灌田千餘畝

凉水井在汪場南里許炭路旁深廣不盈尺泉不竭清  
而甘暑行解渴最宜賣炭翁

愚灣老井在汪場西半里面狹底濶皆甃石深數十丈  
泉極清而甘從不涸旱場利賴之

核桃井在汪場東之南不半里泉不甚深獨清絕  
蝦蟆井在松峯場西飛鳳山一石如蝦蟆大於牛張口

流泉指大涓涓如喉間出下爲井清冷沁心脾

仁壽縣志

卷一

輿地志

壘

松柏古井亦曰靈湫井在治南碗廠橋左從不竭旱尤  
水盈盈味甘癘疫飲疥癬搽卽愈

甘泉寺古井莫測深泉甘涼震齒

龍眼井在龍塘旁上流丈許寬長十丈許石港巖疆下  
乃井周圍二十餘丈泉奔注不止中有峙石嶄然爲蔣  
橋河源南入三洞橋與深溝水合

竹巖南二井水時瀉出灌田數百畝西流達新橋

玉泉井在治東六十里井口圍徑丈許深及十丈大如  
故子午潮漲煎其水味甘



抱頭堰卽岩鉢逃在煎茶溪西巷外 國初謝存陽謝月陽二人傍山鑿溝穿街搭橋引水灌河灣壩田一千餘頃

漢陽堰在廢籍縣東五里武德初置引漢水溉田二百畝文德元年縣令陳充復修今籍田舖赤水也堰無

古佛堰在治西北古佛洞乾隆二十八年縣令南曰廷自洞之野桂壩開鑿江水勢低堰高改自羅家林堰口起至彭山縣江口爲堰尾計長八十餘里灌華陽仁壽彭山三縣田萬四百畝鑿石筒三十三田千畝給筒口

仁壽縣志

卷一

輿地志

渠

三寸五分不及遞減堰口至豐澤洞爲上則仁誼筒爲中則清良筒至堰尾爲下則畝歲派銀上則一分五釐中則一分下則五釐大修畝派銀上則二分五釐中則二分下則五釐車桿田準下則新墾田報加派歲修費有贏留來年用三縣各設堰長一人專駐堰頭隨時修築保護經費亦掌之堰長責溝長溝長責水戶按畝完納報銷時經理員仁壽則縣令俞爾昌仁壽田計灌三千七百餘畝

古佛洞下有古溝穿山洞出長五十七丈開塞通淤



居然堰道

鐵椿堰在清水舖

太乙壩堰紅土堰觀音灘堰在楊柳場

石滾堰官壩堰在石滾河

龍堰在龍巖寺前山三面缺其一面堤之無源而蓄灌田二百餘畝

鴛鴦池方家壩草狹溝大平橋十三堰在境內今無曹家大堰鰲林場左十五里水源牛角寨上堰黃金下堰鳳翔皆藉此水至馳家河與文公菴溪水合

仁壽縣志

卷一

輿地志

畧

龍過灘二堰又二十里張家橋三堰又鴨子池一堰又十五里放生池堰又五里中和堰又二十里辜家堰又二十里白土鎮堰俱引龍水又旱五里四堰

七姑堰在治南十五里一溝間地有眼泉三股碗大上噴出成河至十里舖水遂大昔以七姑分此堰水遂名龍灘堰在治南三十五里源出窄溝子流甚駛里餘石灘抵塞因爲堰灌田甚廣

大石堰小石堰在治南五十里兩堰中界山四周及底皆礫石小石堰中井二一深莫測底



天生堰在治南五十里岡巒四阻成堰爲石龍頭曰龍頭井北五里石龍口南十里石龍腰又南十里石龍尾尾有卸甲堰蜿蜒數十里登山望之儼龍

燈盞堰在治南六十里三回山環中溪築之堤深三丈許上廣下狹溉田數十頃旱甚不竭

游家大堰在治南六十里滙眠牛溝水左卽龜溪寺兩山交束成堰溉田六十頃有奇大旱不涸

蠻泥溝十里段家壩堰又十里高河坎堰又二十里迴龍橋堰又五里青石堰又五里通江堰又二十里偏壩

仁壽縣志

卷一

輿地志

辛

堰又十五里順江場堰又二十里李家壩堰又二十里向家大堰又二十里孫家堰均引蠻泥溝水

松峯場十里花灘堰又十里青獅堰又二十里鐵牛堰又十五里青水堰又二十五里八仙堰又二十五里呂公堰又十里王家堰又三十五里老婆堰又五里高橋堰又十里觀音堰又十五里滑石灘堰均引寶珠溪水古河堰在治南百一十里水如箭流數里遽曲滙爲澤下流岸且窄壘石堤溉田百餘畝一名許家堰

天心堰在治南祿加場西二里圓如箕底釜狀潄水溉



田百餘畝水素澱或清必明年旱

分水嶺三十里積福堰又十五里五皇堰又二十里高灘堰又十里黎家堰又二里魏家灣堰又五里官渡堰又五里和尚堰又十里江口堰又二十里迴龍堰又十里龔壩堰均引官渡水

汪家場西芙蓉池堰一里五通堰南三里李白渡堰

凡若注瀦水塘堰堰利筒車二三丈大竹榦中含軸橫兩端架上下開函輪水槽於堰中邊上懸承輪木槽於輪頂下木槽丈長大尺竅而貫筒達水注處輪際繫筒百十皆大而長尺許留其底口斜向上旁箔數寸大助筒力如矯翼堰水大流歸小槽激輪轉筒隨吸滿而升臨槽傾瀉如雨又降焉吸槽有受盡注

仁壽縣志

卷一

輿地志

至

筒達去水日夜流則筒日夜轉水渟則踏之轉却喫力塘利板車丈長木槽濶六寸微高槽頭橫軸作八齒輪出柄手可挽輪環以槽容薄板五六片一串柄引板歷歷循齒輪轉槽頭入水數寸板恰捲水盈槽上注踏車高架低其裏橫木二半口圓淺淺銜軸兩端軸五尺長近裏各四大齒倚可踏中安十六齒大輪槽頭承之取板環大輪齒只手車柄軸不用舊志縣屬自古佛洞外溪水細流無能大堰因灘鑿溝置筒車水灌數十畝而止早年流斷筒車無用故有憂旱無潦

附壩屬

張壩在涂場北寶珠場南

貢土壩在和場南五里連下段壩長六七里

偏壩在鎮子場北十五里



杆燈壩在近坪橋下十餘里

李家壩在寶馬場下十里婆支龍水滙處

余家壩卽金盆井在馬蹄山下

張家壩在張家橋北里許

孫家壩在龍水通江水滙處

沙墩壩在張家橋下流五里

宋家壩在張家橋踏水橋放生池下

陳家壩在中和橋下里許

辜家壩在龍橋五里綠水龍水滙處

仁壽縣志

卷一

輿地志

五

劉家壩在鴨子池上五里

冷家壩在北斗鎮下流五里連上下壩縣東南東北諸

水大滙處

董家壩在北斗鎮下流十五里

向家壩在貴平寺

江家壩在大滑石

羅家壩在大滑石下朱家橋上

舒家壩在朱家橋下五里

吳家壩在朱家橋下十里



平灘壩在汪場西五里連上袁張廖壩下則嘉魚兒壩  
乾壩在汪場西十里連上濫壩

劉田壩在汪場西十里碗廠鎮江汪場水滙處連下千  
石壩韓壩

唱歌壩在復興場北縣西南隅官渡擁斯茫水滙處連  
上劉家壩下西家壩

龍居場壩連下魚壩在龍居場陰晴魚蛇二水滙處  
太乙壩在楊柳場南五里

金華池壩在籍田舖東連上彭壩鄒壩宋壩黃壩南楊  
仁壽縣志

卷一

輿地志

三

壩卓壩劉壩張壩雲壩何壩西賈壩高壩北樊壩石壩  
五里壩連李家范家宋家戴家河壩五壩在尖茶溪北  
里許長八九里濶里餘

石滾河壩連盧家蘇家魏家鄧家劉家石家諸壩在尖  
茶溪南五里

古佛洞河壩

黃龍溪場壩

桐坪近三岔坳

射箭坪馬鞍山前峽中



飛佛坪中壩井下

麻坪近開元寺廣十里

漆坪在汪場西高坦七八里

林坪在汪場東廣五六里

魏坪在松場東縱橫平坦二十餘里

息壤田在治南二十里滿水井旁有地數十畝泉上滂

出從不早每早稻愈宜

凡若注縣山水間坪壩百餘小出穀數百石不論錄其大者或出穀一二萬石少亦千石以上至二三千五六千石不等

仁壽縣志

卷一

輿地志

壩

附 洞屬

豔陽洞在治前重巖下崦岈幽窈距閭閻不數武若與世隔其洞自東入西深三丈九尺濶五尺三寸完全是石洞門第一重高六尺濶五尺二寸第二重門高五尺五寸濶三尺七寸第三重門高四尺七寸濶三尺五寸第三重門內從頂至底一向高六尺一寸其門三重相距各三四尺鑿鑿精巧殆非人功第三重門內南畔別有石房濶七尺四寸高四尺八寸深四尺二寸其後別一小洞片石掩其門從縫照之深不知底北畔亦有石



房深四尺二寸濶七尺六寸高五尺房內石牀一所西  
畔又有小石房深三尺濶三尺五寸高三尺一寸西北  
畔有石牀長三尺八寸濶八尺二寸西北畔石竈模長  
二尺三寸門額濶七寸竈深八寸周圍三尺五寸從洞  
門向東直至鹽井西相距四十一丈八尺洞門面正東  
朝陽射入幽豔可愛

明宏治中瀛洲仙子詩豔陽洞裏鎖春雲劍氣光寒  
靖海氛百里生涯縣一井道人千載著奇勲 王爾  
鑑詩峻壁清霄直幽巖瀚海通聿誰鑿混沌而我訪

仁壽縣志

卷一

輿地志

五

元功豔妬妖容麗光憐劍氣雄祇今洞口外竹影弄  
清風 邵堊集句亂藤穿井口每與精靈通道術會  
留意巖花應費功雲霞交隱映龍劍有雌雄徒仰蓬  
萊地仙衣盡帶風 又雲開小有洞近在豔陽晨物象  
原無我支離笑此身守愚資地僻舉目望仙真暫住  
蓬萊閣前山賞更新 劉錫申詩古洞鑿石壁仄徑  
穿幽林不見豔陽天伏日生寒陰傳聞張道陵於此  
燒丹金我欲從之遊所恨山不深 鄭彬倫詩我縣  
署門前石洞幽且潔聞有張道陵嘗於焉養拙卓午



風生涼豔陽無乃別過去宦遊人應解心頭熱

若凡

詩蓬萊閣裏漢仙都一石完然匠鑿無有洞背崖泉  
八角當門距里翠三隅書都愈病忙陳過劍可埋妖  
等受符也得署官來弟子去偷桃食膽甯麤又要學  
長生蜀國之武陽東境佳天師也嫌故浦非雲壑固  
有真陵在水池藥采何山丹儘服溷除載道罰甯施  
一般大洞仙源接流落衙前且細窺又一夢泥封漢  
豔陽間問數武入雲鄉仙居百代猶龍虎靈蹟千年  
有鳳凰誓井藏衣沙滿洞冲天遺竈石重房鵠鳴著  
就書誰受可惜無人只趙王又太學書生晚羽流也  
知山好是陵州精思忽有天人名勝都堪野鶴遊  
正一明威原這箇哈呀幽窈故多秋  
重來我亦無他物剩對仙師老白頭

大佛寺洞在治北百一十里黃龍溪石洞二一高十餘

仞廣如之深三丈餘石牀石竈俱備一深且幽不測

仁壽縣志

卷一

輿地志

奏

古佛洞在治北百二十里錦江旁洞岩半深三丈許供

古佛一旁小洞亦深丈許

張問陶舟過古佛洞詩石亂篙聲碎灘平竹影留小

山全貼地尺水亦行舟疎柳通官堰層岩凸寺樓故

園今漸遠依柁一回頭

穿山洞在古佛洞皇墳山係古佛堰過水咽喉長三十

餘里中有海眼一斗大量之數千丈深未到底今大石

掩蓋之

龍洞在蘇馬頭二里雞公壩下一石穴直下文餘忽平



敞分數穴間柱石如磨礧然曲折窈深時野獸出入藁  
之逾日洞烟他出疑四山皆空

鳴水洞在治東北五十里一名響水洞當山半泉聲觸  
石清越如笙磬瀦爲渠東流灌田數百畝

韓駒自鳴水洞循源至山上詩崇山蓄靈泉萬古去  
不息瀦爲百斛深散入千渠溢其東滙民田又北尋  
山腋斷巖如破瓜飛瀑中盪激大聲或雷霆細者亦  
竽瑟末流垂半山十里見沸白得非拖天紳常恐浮  
地脈呂梁丈人老尙與泪皆出我欲蹋驚湍下窮巖

仁壽縣志

卷一

輿地志

五

齟石惜哉意徒然屬此歲凜凜

仙人洞在治東四十里馬蹄山下寬丈餘旁一縫側身  
入得小洞如井級而下二丈許豁然宏敞石牀石几錯  
落有溪流迷茫出路忽聞瀑聲如雷陰氣襲人毛髮竦  
廢然而返

羅成章詩昇仙得洞成仙宇古洞棲仙洞有主洞仙  
昇去一無踪仙洞年年雲滿樹

北巖洞在治東八十里觀音崖山下洞深不知底外崖  
掩蔽縱橫數十步有泉自崖出叢竹森然咸豐末居人



匿洞中滇賊竟不能測

鶴鳴洞在治東南八十里深八九丈高六丈許橫濶二十丈有奇可爲屋作十數間更不蓋覆洞上危巖可望峩下跨小層坡平眺十里以外幽曠此爲最勝

潘光藻題聯百里絃歌聲仿石室乎文翁重開講院  
千秋俎豆意對峩峩峯兮先輩又仰高山

雲際洞在張家橋里許雲際山左石洞豁如屋

龍洞在治東百里朝陽山曲深莫知所止

皇古洞在治東百一十里石壁一洞高三丈許頂白石

仁壽縣志

卷一

輿地志

五

瑩如玉入一里許水隱隱流又二里漸巨兩岸鍾乳狀詭奇上洞若巨樓二里有橋旁土山隈洞頂越山下瞰昏暗莫測投之石作水聲

五龍山洞在治東百一十里和家場南十數里一大洞外砌石如城堞狀傍右一穴狹尺餘蛇行而入丈許可起行兩旁石岩若樓各洞當中坦愈濶愈高行三四十步一溪橫截斷有石礮長十尺餘礮上聞亂石嗟峨中淙淙水響過此十數武巷街縱橫無數其岩二三丈低高者仰不見頂半空中敞扳石級上如樓者數處有石



棹隱隱酒盃羅列捻之灰燼沿路石笋一最大如塔外此差小不勝計忽至一處泥印隱隱婦人三寸足跡十數又若大牛蹠邊似鋸齒印者數外間風烈迅雷洞中人俱寂無聞

佛耳巖洞在治東南石橫亘約二三里作懸岩勢高聳十餘丈面開一孔如耳高六七丈濶深布四十席有餘下俯蘇家灘河不啻帶幽曠與鶴鳴相似都一大石頭無菩薩占據今開學

蠻坡洞在石金崗北十五里劉溝洞口大如箕入百步

仁壽縣志

卷一

輿地志

五

陡跌下三丈乃陰河又四五百步一大沙壩茫似無邊河有數深處汪濊如潭又數百步漸有光爲龍洞寬兩丈間高七八尺蠻洞爲劉溝水入中會陰河洶洶從龍洞出一穿山洞今沙淤惟水出

穿山洞在週龍場東二十餘里達州古路一嶺橫亘三里許中分峭壁高約五六丈寬七八丈徑穿山過十五六丈時或烟生洞竅眼內

余朋健詩劃然石竇依空山今古長開任往還雲鎖客來疑楚峽鷄鳴人度憶秦關飛岩滴雨泉聲靜野



草含烟樹影閑洞口桃源何處覓娟明夜月亂峯間  
第一山洞在治南五十里高二丈寬倍深不測出泉  
紫崖洞在治南三慧寺右巖壁如削數十丈去上丈餘  
一洞口如小石室旁一徑入甚幽邃有隙泉滲滴外飛  
閣

穿山洞在鎮場南二十里一山背厚差十丈高二三丈  
間橫穿一孔米篩大咸豐初脊斷爲二圓始缺

龍泉洞在治南六十里離龍會山廟里許源泉沸湧冬  
溫夏涼旱祈雨處

仁壽縣志

卷一

輿地志

李

鳴泉洞在治南七十里極深泉流不竭

紅燕洞在治南七十里玉龍場里許獅子山半巖高十  
餘丈口敞二丈許左右開兩小洞轉後復通廠石房四  
間有小穴漏光一蓄水池長七尺廣四尺深八尺池底  
清泉一道大如指有石牀榻竈及沐浴溷廁咸豐末滇  
匪攻石礮火蛋却之卒不敢近

黑巖洞在治南八十里口狹如幽壑內光朗里許水廣  
且深當隙石樓登眺氣象萬千

九龍洞在治南八十里四面叢山錯峙一山腰敞洞高



十餘丈廣數十丈而深外石林立內有溜孔如飛瀑布  
就鑿壁爲龍首泉宛從吻噴出旁稍下左右各四皆內  
向勢若星拱

天仙洞在治南八十五里高四丈餘廣五丈深倍之洞  
外幽篁迴繞中清雅宜人爲鄉塾

人仙洞一曰蠻洞在涂場東八里茶菌寺半山間外修  
竹內深濶甚有石床磴

鐵石洞在涂場東五里坳前一洞無數柏環幾封口中  
濶而深十數里有石門

仁壽縣志

卷一

輿地志

全

古城洞在治南八十里半巖開孔循級而入寬甚仰則  
石筍矗矗洞外高牆避兵所

張洞在張家場東十里巖壁窈然一洞寬九丈深二十  
丈高兩丈餘洞口尤高敞甚中石泉一罅日出可七八  
桶咸豐四年沿洞爲石垣厚丈六高二丈許有門容三  
四百人

蘇洞在張家場南十里削巖一洞寬七丈深十二丈高  
二丈餘洞口更高一丈中有石泉噴出咸豐末外砌石  
如城丈厚二丈許高亦有門有樓有炮台樓上容七八



十人下容三百餘人

九間洞在治南張場南十二里一巖削壁如角如隅頂拖出一石如簷簷下五尺許鑿爲房留其石爲間壁共九間皆門曲折相通間各高廣丈外有井容水四百餘桶石房外爲門二正面以望遠側面通人徑皆下臨陡絕二十餘丈無木梯皆不可上久泥草封閉咸豐末掘開門缺皮猶存

石梯洞在治南張家場與九間洞斜對壁立石巖腰鑿洞高六尺寬四丈深二丈餘有井深容水八百桶水自

仁壽縣志

卷一

輿地志

三

巖端引而注茲洞口下俯七八十丈險勢上亦五六丈高巖就側開一小徑自上而下達洞苔草迷蒙嘉慶初咸豐末剔修之

遇仙洞在治南八十里門高三丈內寬十餘丈頗深孝子洞在治南九十五里山腰一洞深數丈高寬丈餘洞中左有二龍隱隱如繪右二石人像鬚眉森然蝙蝠洞在治南百里有蝙蝠懸翼其中洞口甚卑入容數百人頂石筍底溝流多歧路不敢窮其所至

消洞在夏家溝山隈洞如井口縋而下咸豐末爲木棧



石梯中濶空十餘丈深處水距數武又一泓蓋以木板如平地行行十餘里洞外門扇兩蒙鐵皮居停久出亦無所苦

乾洞在治南百里法輪寺後山麓深五六十丈寬七八丈頂底平夷洞外橫一溪

陽嶺洞在治南百里仙人腳山下溝深處口極狹纔通人曲轉數十步水氣冷然便有流滿蝦蟹岸可憩可行寬丈餘深七八里旁洞層若樓臺濶處坐數十人

神仙洞在治南百一十五里大溝四山環爲壑口仰開

仁壽縣志

卷一

輿地志

三

無丈許大下而俯入乃濶空如一屋宇高絕兩三丈間纔半里徑絕爲外洞其內洞如無隱隱一孔懸大尺半如筒七八尺長上曰石樓故鑿小磴數攀而升豁然開朗亦高且寬二三五丈不等有河曰陰河頗淺狹水清可數魚純黑而細多風冷不知所深行行五六里許皆一樣足容萬人有牀竈等件懸溜不一狀皆白石笋蔡洞在治南百二十里七郎坡前洞二口外洞高二丈許平敞容百餘人厯小竇丈餘始達內洞深數十里暗與大溝茶菌諸洞通濶極容千餘人石几牀竈猶存嘉



慶五年爲石垣其外洞背巉崖時有雲氣出洞口或虹霓咸豐末重修洞門乃避亂處

涼洞在治南七郎坡里許巖腳一小口俯而入狹且五六丈深一池水盈盈深約二丈間架木橋度竟仍巷窄而長里餘較高蓋雙崖夾立再入便空濶高朗行三四十里皆然旁歧洞無數有石碓磨牀棹鎖刀斧昔避兵洞外二三十步又一洞略相似只無水

峭洞在治南百里絕崖壁一洞上殷家坪險莫下下六皇溝有草徑可上高朗濶深陰河水四時流咸豐十年仁壽縣志

卷一

輿地志

奇

修石牆次年三月廿四日滇匪過境十餘賊下蕪草熏洞門者礮斃一賊皆驚去

朱室洞在祿場西十里一削巖半高廠洞如屋宇深入高二三尺或三四丈莫窮其深咸豐末爲石門

遇仙洞在治南百四十里玉台寺後峭壁千尺當半兩洞隔尺許人跡不能到沿巖際左右小徑皆鑿痕險絕女人洞近遇仙洞亦在山半口極狹蛇行始入深邃莫測中有曰竈避兵處

半邊洞在治南百六十里馬頸坳前一石亘長邊削壁



高百丈當中一洞寬十丈外深六七丈高二丈間外四面懸絕旁生一線路僅容人達入洞

響水洞在治南百八十里查場上二里洞貼溪上石巖有數小洞水噴出中一洞更大於碗瀑飛潮湧日夜噴作雷風聲不歇下流溪其上數十里皆乾溪此爲官渡河水源至碗廠流漸大

石屬

自然水石在署內

文同記陵陽守居負山悉石西左砌層巖餘地丈許

仁壽縣志

卷一

輿地志

奎

平夷可屋因植四楹面午橫楣闢幽軒正對大林高株缺間視遠峯若畫工引淡墨作巒嶺疑疑時與烟雲相蔽虧愛此有佳趣復靜密公事少休卽至宴坐伏息日計數取多乃去外俗不得知旁頽巨礪如瘤宜鑿刻遂磨治將記建置歲月沃水盪拭見黜理若髮狀傾灘平波瀾漫飀迤復疊先後倫次窪淵聳浪左右役目自非天寫神摹人巧孰能爲是必由融結固已有堅包厚藏待予始發章物蓋顯晦信在時人理疑亦然苟達此與知命何遠雖爾既有形必復壞



倘後人加護則傳久未易泐也

大滑石在治北三十里一石如梭狀長六七尺濶稍減橫亘溪中黝如常

哆口石在治北三十里楊家大山

怪石在治北八十里龍溪後山往往像人物

仙牛石在治北百一十里金華山右

古佛寺前玉帶一水中有石筍三根今一下芍石壩河中芍石羣如人立高人長今沒河中又下千佛岩岩邊石蟾一一河邊一水底隱相對戲不僅九溝十八岔之

仁壽縣志

卷一

輿地志

亥

多波疊於斯從未盈溢卽洪水大漲皆然石蟾下有美泉旱不竭

鷺嘴石在治北百三十里府河山谷中三里許石燕子上流有巨石跨溪似鷺形水穿其下流天然石梁可通往來

石木魚在治北府河邊落米寺山上有大小石暴出形如木魚

烏龜石在蘇馬頭下江中石方圓數丈水落現似龜形晴明有羣龜聚斯石必陰雨



蓮花石在治北煎茶溪東高廣丈餘狀似蓮花歷經兩  
風不改

鏡石在治西四十五里老木崖山頂一盤石圓平斜豎  
望之波光蕩射如一鏡然

石鑼石鼓在治西四十五里襯腰崖兩山對峙如剖開  
爲兩削壁十餘丈高一壁現石鑼形一石鼓

仙女灘石在治東二十里灘間一石鉅如屋上有兩足  
痕一軒露一隱約十指宛然經怒浪衝無損

響水灘石在治東二十里灘石簇橫若龍鱗高不尺水  
仁壽縣志

卷一

輿地志

七

激之有聲時如雷鳴如鐘吼音大而遠

筆石在治東二十五里蘭溪岸右一石銳如筆插立井  
中今摧折

飛來石在治東三十五里有道人曰此崑崙小石何自  
飛來石高二丈寬丈餘

龍骨灘石在治東四十里兩峯夾峙一溪有石如龍橫  
亘水中鑿爲梁橋頭石磴天然

半月石在治東五十里一帶土巒無石道旁一石高五  
尺許潤二丈作半規體立純土中瑩淨如磨不生苔蘚



初日射之皎皎然光數里外

蟬石在治東七十里龍橋東高四丈大五六丈狀如蟬一罇如張口生楷樹氣葱葱然

赤石黃石碧石出治東八十里古佛寺山赤堅細爲硯黃稍粗以爲礪碧亦堅細如紅爲磨

魚石在和場十里許松山橋下大石高丈餘圍十餘丈平如刀切上一巨石卧如魚大小長短與下石稱按之應手微動力掀之動無稍加

鷄冠石一在週龍場東三里形如鷄冠

仁壽縣志

卷一

輿地志

矣

飛來石一在周龍場西十里石高丈餘形如鷄心屹然山巔微捫之動力推之則不動

大壁山石在治東百里山東有石壘壘然蜿蜒而下鱗鬣森然曰龍石嶺南巖際石大如困團團若卵著地僅尺餘勢若因風轉者爲風轉石又三峯屹立排列如旌旗第一峯石笋二相去丈餘

旱五里石在治東北斗鎮蘭溪灘石一片長五里流爲斷只一七八尺深小槽丈寬或兩丈隱隱水流爲綠水龍水通江清江一大關鎖



飛來石一在治南三十里趙家場東一石圓徑十餘丈  
高七八丈頂平下四石如足承之而起傑然峙平地中  
三塊石在治南五十里鎮子場東三里一大石頭畫而  
三聳立如片黏然

龜石在治南五十里金魚橋上一石頑且偉立稻田中  
頗礙耕伐之中空一穴尺許生石龜圖半大體段神似  
背有皮差黑文理卦畫宛然蟠腹出四脚連穴底石未  
脫

陳韶湘石龜詩我聞元武精入泥滿溝瀆又聞洛書

仁壽縣志

卷一

輿地志

完

成八卦藉以錄原從水裏生乃在是間伏造物戲弄  
人往往破常局美女結妖花太平書瑞木眩惑以訛  
傳乃是魍魎毒射虎李北平題蕉于忠肅且對石龜  
言除爾爾應服盡剷此嶮岼好種彼嘉穀不見靈物  
棲各自有所屬珠浦始產珠玉山乃出玉

蚌石產鎮場南四方碑土山鉅二三寸細一寸或寸半  
初皮黝漸白於粉文理細層層捶之剖爲兩有石漿在龜  
與水產同鏟去之明年繁如舊

老鷹石在治南七十里形如老鷹高一丈



鐵牛石在治南七十里周圍皆田一石大三十餘丈如牛眠

虎牙石在治南八十里虎牙塘塍生成兩石相錯形如虎牙

銅鼓石在治南八十里寶珠溪一石盤溪圓如鼓

寶珠石在治南八十里寶珠溪一大石筓如灑灑堆峙河心頂裂口中空含一石如珠尺大搖之轉動取不出名寶珠

罈口灘石在治南八十里顧家沱上一石平橫河面開

仁壽縣志

卷一

輿地志

辛

數十小孔有兩三孔丈大中一孔面獨圓腹更大甚深如無底苔青水碧上流一東林寺跨岸其下一空洞口窄兩尺許底大不可量

門坎灘石在清江顧家沱上一鐵礦石截斷江流二三尺高如門限亂蜂窩

香爐石在治南寶珠溪上里許岩聳一石高逾丈中下小一束又一束作頸狀上五六抱間宛如香爐

磊印石在治南八十里寶珠溪左方石四面下二上一重比而峙



石牛在治南清江顧家沱岸側一石五尺許長大二三尺土山上狀如眠牛頭角肢腰宛肖

石龜在治南清江顧家沱上流岸一石簸揚箕大尺高伏土巒上頭脚背神似龜

花石出治南漏洞河細而白黝理色藍如花鋸之爲棹几面

獅石在治南石扛坳側半里一石巖端如獅蹲而昂首眉目宛然臍腹踏脊去地數尺面隔溪一石如立木高二丈許大減半頂如一盤珠錯近之如一人夷俟狀與

仁壽縣志

卷一

輿地志

七

獅石對

一柱石一曰石林在治南八十里七里溝小土巒上戴石圓徑三四丈高約七八丈間頂平邊削不可上下差小爲兩脚峙立如鼎然遠望一柱

石蓮花在治南九十里孝子洞前薄石二十餘片層疊如蓮花貼地丈餘高

將軍石在治南九十里屹列凡四皆高三丈餘如人立狀

龍塘石在治南九十里龍塘坳坦石平鋪上覆一石龜



頭脚介宛然勢踞龍塘俯尖山烟雲吞吐隱相離合  
浮印石在治南九十里呂公橋下里許中流一巨石方  
而平如印高浮水面漲如故只琴聲鏗然作泅者日下  
如一孔空竅不知深蓋四面支撐

石鼓在治南九十里河中立石高二丈寬丈餘上平周  
圍圓如鼓形

人面石在涂場南古樓溝余山一石大如屋竅孔玲瓏  
具耳目口鼻如人面

獅子石在治南百一十里巖腰一小石酷肖巖端二丈

仁壽縣志

卷一

輿地志

三

許一方石氣白如銀

靈龜石在治南百一十五里山頂戴一石縱橫丈餘如  
伏龜靈光蔭數十里遠望之大如故

油礦石出清江以南鎮江北一帶山錯落土中油光鐵  
礦火爲灰又有石膽中包堅光帶翠圓如卵敲之火出  
鎮江南大而圓粗而黑石中亦有石膽不出火

鐘乳石亦出涼風坳下百餘里諸山洞中洞故有懸溜  
頂間有大一兩抱者小半圍一圍極嵌空玲瓏白如銀  
尖或如笋碎之中空如乳頭堅如石有皮最生氣



鎮江灘石在治南百二十里鎮江橋下灘心完然一石高幾平兩巖堵盡櫃巖東溝諸水下大沱道光元年旱屏其半灘底乃一伏洞

雙馬石在治南百二十里一河亂石錯落中兩石獨奇氣如立馬水口爲一鎖

高灘石在治南百二十里鐵馬橋下擁斯茫水下流灘石如巖高三丈許水飛瀉如瀑布聲吼聞五六里

麻坪石在開元寺半里道卧石若困獸長徑九尺腰大丈圍手推之搖搖欲活

仁壽縣志

卷一

輿地志

三

仙人腳石在治南百二十里石坦如舒席上有雙足痕十指森列長俱尺餘深三寸許

鳳冠石在治南雷砦鳳翔門山頂石三丈高雄且秀周數十里皆見

鳴鼓石在治南松峯場西飛鳳山一石如鼓圓徑六七尺高如之擊以石鼓聲轰轰聞里外以爲中空洞也呼鳴鼓洞

九塊石在治南百四十里一連九塊大石如黏濶高均二丈許



玉皇碑石在治南百四十里一石薄而方長丈餘光潔如磨端立山脊不傾呼玉皇碑故無文字

月亮石在治南百五十里斗寨山石圓徑丈餘入夜光圓如月

羅盤石在治南百五十里胡家寨下平石一團圓徑八尺餘縱橫紋列皆鐵榦黝墨環直勻稱數十多層羅經風雨不磨滅

瘦石在治南百六十里馬頸坳前山氣一束正橫亘透迤間突一石峯卓立其上長七八丈甚瘦削

仁壽縣志

卷一

輿地志

七

鷄冠石在兩母山下石扁而方壁立千仞頂廣一二丈間望之如玉笏朝天



輿地志

城池

四面皆山歷代無城明正德七年巡道僉事郭綰以東南西三面稍平令砌石城三百餘丈尋圯止存石牆七十五丈高丈五尺 國朝乾隆五十年邑令倪鼎銓建石門題曰安阜在縣署前下街道四坊象四門東朝陽門南拱壽門西阜城門北奉宸門嘉慶元年邑令徐慶昭建咸豐七年邑令莊定安淘河水還故道

李元注縣無城不能城也三隅鼎立街市溝澗之中

仁壽縣志

卷一

輿地志

三

衙署坡巒之上四山高高下下形勢散漫不相連屬非守禦地也今署內周垣當是舊城之半北街倚山民舍即舊城基巨石猶存宋楊綰引水入城城故當在山上 宋汪元量詩歇馬隆州借夕涼壺中薄酒似酸湯城濠借屋偏栽柳市井人家都種桑官逼稅糧多作孽民窮田地盡拋荒年來士子多羗役隸籍鹽場與錦坊 李特壽詩真成蜀道路蠶叢萬壑千岩一徑通忽見人烟三百戶古陵陽在亂山中又也無斥堠也無城絕少重門擊柝聲一任太平防禦弛



山林老死不知兵

凡若記邑城居數百家負山傍

鬆經雨崩流入河勢甚便以故河率泥淤不通於極  
雨漲泛濫穿街淹戶亦勢使然歲在丁巳夏五月夜  
半山水大至當是時余在公局驟聞浪洶洶聲又聞  
風聲雷聲雨聲人聲雜然而起起視瞥眼電光波  
燈火光微茫天光出沒迷離須臾街頭水深四五尺  
許水退屋壁半穿什物往往不存民不其魚皆幸遲  
明言於縣主莊公公曰吾故下令淘河今仍當與士  
紳議會劉石渠于涉川素有建言公乃以一以淘河之  
任委之三月而工竣河復故道就下流為隄瀦水灌  
田水澄清可鑑人沿河旁植桑柘楊柳蘆竹別饒風  
景可愛當河衝要特開深池二十餘所消受沙泥絕  
河之淤於後計費錢數百餘串凡若注縣治自宋  
以來三隅山環羅為城一龍水穿中過不啻池天然  
險設以守考交州狄人棘竹為城枝節皆刺又台灣  
沙不可城栽竹盤錯馮逆猝不能城架樹層疊是亦  
城也沿邊重濠因之縣治西北大山橫亘巋如牆立

仁壽縣志

卷一

輿地志

美

東南開小缺口何等門戶相其扼要乘其憑高益之  
關門堞墻礮樓炮台占盡地勢之險雖劍閣石頭不  
過前令馬少錢胡若川兩先生有遷城議故與李太  
初先生見同陳韶湘謂遷城於東關外數里又與馬  
少錢先生意同毋亦跨山而城且大不如平地城小  
而濠易守攻城之法只有地雷一着山溪居民焉有  
許多與守川省州縣無城者十仁壽般蕃按糧舉之  
亦易為力然如鍾刑席慶柱言潼川珠江因山而城  
一様高高下下乃其削險增高聯屬補缺加以關門  
礮樓礮台占盡地步扼險而守賊亦焉能飛入總之  
縣不可以無城或遷而城均官隨亡而民隨  
亡或因而城或遷而城均官隨亡而民隨



輿地志

官署

縣署在隆山前康熙六年邑令羅立建大堂恭懸

御書清慎勤匾額大堂前儀門內恭立

聖諭書爾俸爾祿民膏民脂下民易虐上天難欺坊

摘五代時

孟昶官箴中語東西列九科房內外二監二卡另女監一署左

常平倉一所署前監倉一所咸豐十一年三月二十七

坊及西四科房上卡房滇匪焚燬邑令胡圻重修左科

房五間頽壞同治四年邑令羅廷權補修

仁壽縣志

卷一

輿地志

七

乾隆五年

上諭各省州縣與民最親凡大小案件無不始終於州縣

衙門是以舊制錢糧刑名等項分委承辦設立有六房

即附於公堂之左右使經制書吏居處其中既專一其

心志正慎重其關防立法最善乃聞近年以來多有六

房傾圮不加修葺書吏棲身無所往往抱其卷牘收藏

於家每遇急需檢閱之案有無存貯悉以書吏之口為

憑而隱匿抽換之弊不可枚舉前後印官雖已知其弊

而因循苟且或修理無資遂沿習而不知整理亦吏治



之一端也著各省督撫飭查所屬州縣若有六房屋宇未備者各按舊基如式建造將一應案牘慎察收藏並查明號件登記總簿以備稽考倘書吏換班有私帶文卷出署從重治罪若本官失察一並議處其修造之費著該督撫藩司於本省公用銀兩內確估給發特諭

李元注縣署倚山蓋自宋以前蘇軾云陵州在高山上文同亦云陵陽守居負山 王爾鑑詩陵陽之署高以軒紆曲石磴何盤盤摳衣而上闢門戶排闥四望生雲煙高巖古木插霄外陰森翠結綠雲蓋枝頭

仁壽縣志

卷一

輿地志

三

好鳥時交聲吟破天風響天籟公餘峯頂開雙眸三隅翠湧胸前浮遠望青城並峩嶺恍登三島遊十洲地靈從古鳴三鳳允文昌期萬年頌莫道今人遜古人有志竟成休弛縱芝嶺霞飛花自芬蟠溪一曲鎖青雲間來每上平雲閣無限溪山嘯夕曛 姚令寬詩居高形勢獨軒軒四圍嵐翠相縈盤徙倚山半營官舍齊雲樓閣浮青煙崑居超出塵埃外禽爲鼓吹松爲蓋古木森森繞石巖幽泉汨汨鳴秋籟幽泉古木豁人眸登高而望黛色浮步步引人入勝境何須



更羨凌滄洲峭壁橫空翻若鳳甯園以箴不以頌欲  
得廣廈千萬間會見普甯民氣縱我來正值桂吐芬  
一峯頂攀條若步雲蒼茫獨立石壇畔點點歸鴉正夕  
曛 李特壽詩雲峯苔壁有人家灌木參天石磴斜  
只道路從山嶺出不知山嶺卽官衙

儒學署在城東南雷月峯前聖廟左側下教諭明倫堂  
左訓導右

典史署在縣署左

駐防公廨在縣大牌坊街飛泉山前道光二十三年添

仁壽縣志

卷一

輿地志

堯

建公廨在黃龍溪與華陽彭山二縣共



輿地志

關津鄉甲場公局砦橋

鄉甲  
場屬

明縣十二鄉東林蘭池上安樂下安樂上怡歌下怡歌

上順和下順和玉屏儒社瑞雲漢陽 國初為東林順和

安下三鄉城東街一甲高石嘴泡馬灘 更名寶馬場 西街一

甲孟家店分水舖梅橋舖東北順和鄉五甲一甲龍駒

場金河場大滑石文公庵興隆場松林灣撫均場二甲

秦皇寺煎茶溪紅花場黃龍溪嘉禾莊藉田舖洪相寺

仁壽縣志

卷一

輿地志

平

石膏舖大林場白店舖三甲觀音寺三星場延相觀圓

通寺高家場中壩井中興場太平場古佛場四甲鼇林

場馬鞍場玉樓場金和場老君場五甲楊柳場清水舖

五聖場永興場光相場正覺場里仁場白壩場西南安

下鄉五甲一甲方家場向家場馬溪場二甲龍橋場張

橋場梧桐場三甲白土 更名北 鎮富加場謝菴寺四甲芋

頭 更名玉龍 場週龍場五甲和家場甘泉鎮石金剛東南東

林鄉五甲一甲趙家場虞家場針匠店 更名鍾祥場 滿水井

五顯場二甲鎮子場徐家店韓婆寨曹家場觀音橋三



甲五皇場順江場戴寺橋四甲朱家橋順龍場青岡埡  
五甲甦甲灘祿加場張家場涂家場松峰場迴龍場汪  
家場大墳場查家場碗廠場寶珠場青石山復興場集  
福場新場清風場彭家場

凡若藉田鋪詩少宿長亭且白頭愛他風景小勾畱  
四山平遠金華外三水滌洄玉帶流卻有藉田成廢  
縣猶餘息壤說隆州蜀王到底無名氏一墓場邊去  
悠悠富加場詩水平石盡四開陽明十二鄉此首  
場淺碧邱原雲薄薄嫩晴烟火霧蒼蒼市花一廟如  
奇貨館穀千家問上方再至也憐東道主不知緣底  
忙日歸

沃野迄宋為雄關南行控輿馬悠悠千餘年滄桑幾

仁壽縣志

卷一

輿地志

七

傾瀉下寺成荒塋高原多廢瓦忠肅石琴台引領空  
梧櫬子蒼竟何之一去知音寡先達遂淪沒弔古淚

盈把 聖代黃河清通衢羅廣廈號為闔闔居復枕

青巖下平崗如盤石桂室接蘭若翠柏相蔽虧但見

垣墉赭山水信佳麗風物亦嫺雅歲開文酒宴簪黼

聯吟社一塔指蒼穹何當凌九夏

凡若鎮子場詩  
淺溝小嶺綠陰

濃烟火縱橫氣鬱葱儒社有鄉開始建禪林何境說  
圓通芝山韻又琴台外花市忙還古鎮中多少彬彬  
儒雅在讓乞丐一香風 祿家場詩聞說字橋舊  
此栖好畱詩客引雲梯百烟小聚還成市四水內流  
故不溪石氣浮山黃壤接芸香剩院綠林迷春來桃  
李茫何處辜負東家是我西 松峯場詩老山東去



嫩山西嶺半飛橋穩杖藜一切涼風攢虎石小源活水隔邇溪彌陀有寺坊垂古大佛何巖市壓低也道松峰無限好天 王鴻訓汪場詩獅蹲龜伏老龍蟠仙畱筆要詩題

蓄翠排青敞復關地氣精靈分息壤人煙葱鬱滿船

山迴風塔領疎嵐秀積石池盈活薛斑再到斯文看

未了問誰常有好容顏 凡若汪家場詩老幹紆餘錯土巒風光如畫小南邊

一泓嫩碧流官渡四匝層嵐鎖市煙息壤假山地塔迥金錢涼井襯樓懸愛他秀絕獅巖下又帶邇靈產

象賢光先汪家場詩疎落村林鬧市煙四山環繞小南邊也疑欲出雲都嬌日傍丹樓紫塔眠 凡若

查場詩不盡溪高下窮坡抵上游木槽懸水過野燒凍雲流稻打田翻蟹林深谷隱鷗渺然人影斷坐對

老山秋 寶珠場詩異樣膏腴僻在隅紅埃一抹碧烟俱山踰漏洞稀頑石水下清江滿寶珠半岸危樓

仁壽縣志

卷一

輿地志

三

家傍麓長橋小艇市沽鱸不知風氣開何晚路路芹香昔故無 碗廠詩谷口疑無路流來眾壑泉一灣巖石伐兩岸碗窑填樹密如籠水人 孔昭清碗廠稀不斷煙晚涼歌四起鳴鳥和悠然

詩一溪穿破兩邊山窄窄旁通路幾灣不見人家何

處去蒼茫雲海碗窑煙

公局

公局咸豐元年三鄉稟請縣令史致康設立縣城公局

考棚第一重左三鄉公局東林鎮子場順和清水舖安

下富加場城公局一年一鄉一人經管賠買社田收息

歸還原額鄉公局各管社田租穀儲倉與城公局通同



辦理嗣并鼇峰書院田社倉查封田積倉杏林庄三費  
肉釐洋煙釐或及軍需津貼捐輸諸務再派局士都城  
公局統之初定局士各錢二百文食費百里程五百文  
轎費遠近加減書算工食紙墨茶油小費另支每遇重  
大要緊公事及每年十月清算數目更換局士俱准知  
會三鄉明白公正紳糧前來日費轎費如局士樣支發  
咸豐八年縣令張爾周定議全年各給薪水錢六十千  
文來往轎費在內

凡若城局集聯應變設權所以解結含章司契不必  
勞情又綽約微達此似察廉貞溫粹而無瑕又凡能

仁壽縣志

卷一

輿地志

三

其於府也殆去  
智無以知則公

若  
屬

天保砦在楊柳場東二十里砦五峯尖峯寺香爐山木  
魚山虎頭岩黃連坡下深溝咸豐四年脩門四垣三面  
皆石砌西香爐虎頭如城辛酉滇匪竄土地坎居停六  
百餘家將來攻至高店子一望而去

牛角寨在治北百一十里高場西六里獻賊亂修故址  
猶存

仁安砦在高場東四里土城兩層滇匪亂修又二里許



團山砦簡團安三曾營此

聖泉砦在治西三十里懷空寺砦後半巖一穴內寬廣石牀棹橙俱備有池咸豐末修

老木巖砦在治西四十里厯亂羣山中巋然高峙北巖倒懸石壁光如磨橫一里許陡絕數十丈餘差土勝微坡咸豐末沿邊石垣爲門三內容二三百家滇匪過窺伺前門殲其五六人竟不敢犯砦每晴宇西望青城雪山皎然在目皆作屏帶筆印諸狀日初照金光燦爛稍南望峩眉黑白掩映江煙一抹都隱不見

仁壽縣志

卷一

輿地志

出

石牛砦在治東三十五里近白土橋溝有石如牛

黑虎砦在治東六十里山高數仞黑石如虎負隅狀明末討流賊駐兵所

救苦砦在治東七十里望雲山上有大士像旁山麓小溪嘉慶初修

齊家砦在治東七十里隆然三山峭壁四面高七八丈低處二三丈上容千餘家有田數十畝堰三常有水僻在羣山中道光十二年改下州路咸豐末滇匪三分股過其下砦上寂然躑躅而去



觀音巖在治東八十里長五里八重巒四圍峭削高八九丈最低六七丈上平田三十餘畝石堰二形似飛蛾下深谿咸豐末爲之採大門四小門二曰大成砦東紫山砦在治東九十里清水寺上山高四五丈四邊石巖微缺砌補上濶半里許水塘一容百餘家咸豐末修放生砦在週龍場十餘里山四峻壁後一均寬二丈餘爲門上長百步橫四五十步容數十家下環小溪咸豐末滇匪過不敢仰視

仁壽縣志

卷一

輿地志

五

大壁砦卽治東大壁山

砦子寺砦在治東百一十里蘭溪下陳家沱邊資中界與陳家大砦隔江對峙高十六七丈四削巖爲北斗鎮門戶外五里一蓮花石插立江心縣東之總水口砦上容三百餘家一水池咸豐末重修

洪福砦在治南六十里鎮子場東二十里石山橫立高十餘丈四際危巖增高石垣如城兩徑上頂縱三里橫一里有田三十畝塘十餘咸豐末修滇匪但望而去衛星砦在治南七十里張場十里三面懸砦高可五丈



一砌石墻高三丈兩砦門內有田畝水塘周圍寬五百餘丈

觀音砦在治南七十里張場十里三面懸岩前豹子山內田塘皆層巒下觀音廟

象鼻砦在治南八十里老人橋上游山長五里濶里許邊光滑如一完石左右懸崖前一石墜下巨丈餘長十丈宛然象鼻咸豐十年修爲砦

萬全砦在治南八十里張家場南一山如鵝頸爲後砦門分兩岐里長而濶中一溝卽古樓溝缺口爲前砦門

仁壽縣志

卷一

輿地志

尖

通石垣高四丈許橫十餘丈外一溪寬二丈回環里許如濠距後砦門半里兩山一溝爲一砦左一山有石門爲砦中砦通有田土有水容千餘家人嘉慶初修咸豐末重修

天生砦在治南九十里三面崖懸高十丈間石砌垣一面約三丈內有田二十餘畝

天寶砦在治南九十里去太平砦一坳間山勢盤曲周圍懸絕咸豐十年修

活家砦在涂場南十里去萬全砦五里有田二十餘畝



九塘

青石山砦在治南八十六里一峯孤立數仞高完然一石狀如馬鞍只一徑上舊砌石咸豐末連對山一面懸巖欲墮砌石高七八丈爲兩砦容數百家曰青雲砦天緣砦

太平砦在治南九十里陳家巖周遭峭絕緣兩小磴上澗極容萬餘人有塘灌田十餘畝井一泉冽亦不涸眞避亂所

芹香砦在治南百一十里何家場八里一山曲如半鈎

仁壽縣志

卷一

輿地志

七

四面陡絕高二三十丈周遭深溝一徑上門一上田十餘畝有塘有井容五百餘家咸豐末修

大願砦在治南百三十里薄刀嶺近松峯場山不甚高而四山卻低無敵上田百餘畝塘十數稱沃壤足容數千家咸豐初修亦稱堅壁

天險砦在治南百三十里牛蕩嶺隔大願砦一溪間勢與埒山較短窄扼要可守咸豐末修

長生砦在迴龍場南十二里四面懸巖上小巒有田四五十畝數水塘容七八百家咸豐末重修



仁砦在治南百四十里遙連碗廠橫亘五六小巒前溪後壑左右層崖峭壁亦高絕上良田有深池泉仰出筆架砦古曾砦卽治南墨山

鳳凰砦在筆架砦左高數層山上兩峯最險絕

雷砦一日天全砦在治南百三十里高砦前向砦左筆架砦右橫亘二十里許山大開張上平田數百畝堰塘十數小巒不勝計左右削巖右么砦門微坡前砦門當一高阜砦後附一小砦四旁大砦環鎖較勝又內一小砦亦扼險要各門墻石堰長二里深丈許去汪場不十里

仁壽縣志

卷一

輿地志

六

里有警穀米牲畜器物等等最便窮民搬運

程佩箴雷砦詩南來幾百里人境似都非巖曲路千轉天高山四圍生雲煤洞古助火蕨苗肥笑我漁郎伴桃源且漫歸 葉湘南由杉樹灣小路趨雷砦詩  
啜茗俱已涼撥草尋幽徑山花點綴紅松濤足清聽  
綠竹緣谿秀蒼崖茅屋孕陰雲送雨來蚤暮疑難定  
何處鐵佛寺泠泠響梵磬砦門遙入望天地忽已暝  
巉岼不可攀楸棹沒及脛捫蘿到所憇鮮衣坐石磴  
良友各殷勤置酒洗泥湍歡然燈燭下杯酒相持贈



葉湘南雷砦還寄尹仰山參軍詩君不見雷家山  
勢摩蒼穹層崖刻削皆天工絕頂凌雲高莫極但見  
長松怪石青蒙蒙鳩工伐石壘爲砦雉堞巍巍列如  
畫常懸瀑布隨風飛渴時不必望井拜尹老將軍氣  
昂昂身經七戰歸故鄉矍鑠于今七十五徧求名勝  
古陵陽教予急伐西巖木趁早山頭結茅屋浩劫茫  
茫不可知血流滿川尸滿谷予聞洞庭千里大波橫  
賊船飛渡吹簫笙又聞金陵池郭冠九牧賊兵擣之  
如破竹蜀山險隘三峽長未雨綢繆川東旁側聞黔

仁壽縣志

卷一

輿地志

先

獠新造逆瀘渝壁壘宜相當邊陲不守險如此一二  
窮山安足恃君不聞古之鄉田農皆兵何曾餘生坐

待死

凡若雷砦詩古砦殊風日騎龍此下幃錦雞  
驚兔起木葉入泉飛亂石埋青靄閑花豔翠

微一碑畱記在  
字字著苔衣

段砦在和尚巖高向雷三大砦中連雷尾三邊深溝巖  
險絕上兩大巖咸豐末築堰一草徑如雲梯陡於諸砦  
向寨一曰清平砦由櫃巖迄蘭泥坳爲上砦又迄陳巖  
中砦旁左數阜隆起小內砦右石筭巖小外砦月亮巖  
起迄左鐘觜右挖斷頸下砦通爲一砦長十餘里上下



砦孤立二三層巖中砦左右地步較濶右尤長六七里  
各上平行雜無數小巒頭有田百畝餘池塘二十餘處  
多松蕨蘭蕙山雞野狐下石炭如高雷砦四旁左抵高  
砦隔一溪右抵土門坎金龜廟下大溝前一嶺橫逼後  
雞冠石下大壩嘉慶砦門墻半圯咸豐初加修完善統  
門八

楊榮先詩向山老橫亘一跌又一起勢如常山蛇劃  
分首中尾巒頭不可數天然之壁壘削立千丈長上  
或平如砥我行訪桃源逝將此焉徙開荒半膏腴舉

仁壽縣志

卷一

輿地志

卒

火足薪水頗聞獻賊亂幾家逃之此今遂爲老戶頽  
垣畱其址又聞達匪亂補葺半且圯時平寂無人鳥  
蛇不知幾我生在珠江愛著謝公屐正不風鶴驚一  
一忙整理開門巖缺間結廬雲窩裏砌石周採牆堅  
城莫之比可以無一事三兩耕且耔春風香襲人何  
處蘭草是山中樵人夥言贈誰何子幸有一騷客伯  
不時於焉止曰我君姻家忙酒不須旨大醉下山去  
言言皆有以後有莊公來子陵州之刺史一宿蘭泥  
去險絕甯終觜時正丁巳夏大旱雨盈岷復又仙井



王子周覽驚以喜數年蜀必亂此外不足恃兩人行

冷官我亦侯百里無何滇匪亂山遂開如市一家又

一家當年都不爾巢成何必居行行歸桑梓留詩告

來者我亦聊經始

凡若高若過向若詩在山不覺高下山纔覺低既下緣溪行幾

轉路又迷屹屹左右巖百丈不可知下亦無光照六月風淒其便上一地石門而天險梯不知頂上人耕鑿樂否疲昔有桃花林良田和美池山口纔通人此都髣髴之相率不復出當時誰攀躋珠江楊春翁買山十年茲既勞亦且費後來大便宜宦海簞弄人往迹方依稀我鄉與君鄉從此以瘡痍我則引疾還君猶丁未歸思之斷中腸而今告語誰不如一醉去相忘主人非他日及君來兩兩罄所懷

仙鵝岩在向岩左獨山三面懸崖一徑上

仁壽縣志

卷一

輿地志

空

高頂岩今日仁壽岩在縣南百五十里山白櫃巖來若

人若筆岩雷岩向岩皆險絕而高頂岩為第一高頂列

岩中間一岡九巒或言九老山都作層巖削如牆立欲

上千仞不啻蒼避獻賊此焉咸豐初重修岩門三井數

十池十數寒泉清冽蓋石出亦壤田而稻畦而蔬或坡

或原或溝其樹松花映山紅竹一草叢石虎氣鐵黑外

望四面孤峰特奇雨過峩眉平等爽如挹忽陰雨迷茫

雲海不知四山所在每有罡風欲飛人無甯瓦屋晴和

閒鳥飛飛錦雞出時有歸雲清幽曠朗比於福地洞天



不但避亂李逆亂居停且七八百家

凡若注高砦下楊氏子言獻賊亂分股札營御甯寺牌樓關關馬溝我先人籌坡避居高砦賊圍攻三月不下砦擲下塘魚數尾皆尺長驅羊豕沿砦鳴賊始退與我先人和計誘關馬溝營割其頭擲之去頭大於鉢時砦八十餘人多絕食 劉靖題山八景九老只存十餘我先人頭葬山下

春遊兩母秋霽隋壁靈芝盤陀仙李月夜松濤雨晴

石溜雲根倚凍海光盪空

凡若題山二十四景削巖牆立危洞梯懸峩眉

逗翠高頂撐空井泉石上煙火雲中罡風飛瓦晴雪印泥雀噪疎松牛耕晚稻菜青滿園花紅豔山觀音半閣君子一灣茶園苔鎖書館雲還半嶺花國長街酒樓魚塘把釣鳥路來樵緜袍生濕煤炭供温冷官消夏賢宰頰春魏劉譔 揚希淦詩雲水浩茫茫居

仁壽縣志

卷一

輿地志

三

山恍居海一氣互溟濛頃刻萬狀改我聞赤城霞照

耀靈奇彩又聞黃山雲布獲恣蕩駘那知高砦高光

怪轉百倍朝朝暮暮間雲氣斯焉滙一散颺輕煙一

聚幕重綵東西億萬里上下數千載何人過而問山

鬼以主宰藉問今安之登頓意亦怠蝸室而蜃樓亦

有市成亥在山泉則清出山霖有待瀑飛菜畦旁新

涼起松礪一樣三神山仙人大自在混漾金銀台香

冠束華髮舉手大招邀欲從終以悔還去老醉鄉非

福亦非罪

凡若詩不知峰絕頂放眼曠無垠駭蟄盤叢蕨奔泉滴宿雲天風終日響人語



四山聞剩有荒田  
隴誰來植杖芸

凡若注咸豐初蜀晏然無事縣修砦六熊錫桓等修大願砦張彝劉天祿等修雷砦謝世定等修天保砦資中楊榮先李茂和等修向砦資陽孫英等修高頂砦他處無聞而高向雷三砦皆老山獨險峻以大不數年滇亂及此三砦不下百十萬人居停遠且幾十州縣纔知修砦之利於是處處修砦縣亦不可勝計庚申辛酉賊三竄汪場都經過砦下竟不敢犯而去後壯下砦耕貿如常老少婦女畱或兩三年不反

青林砦在查場西青林寺後山一埂長廣約五六里咸豐末修

趙砦在迴龍場東南一山峻廣三四里咸豐末修

長埂巖砦在復興場東北山長五六里高險可守咸豐

仁壽縣志

卷一

輿地志

三

末修

胡砦在復興場東北五里山長二里餘險峻獻賊屠縣響灘胡氏此躲避出咸豐末重修

清風砦在治南百四十里查場去十五里周遭深壑一小徑緣巖上巔巒良田數畝巖邊壁削同治元年修

兩母砦即治南兩母山高絕險絕為羣砦最咸豐末吳惠春母楊氏獨修架屋十數間族鄰避難者依之不派索一錢金儲穀百餘石供食獨稱便

四六砦在兩母山前二里左右際牆立危巖上里許濶



有三三畝稻田容三十家有巖溜可飲

左家砦在治南百九十里交榮界山險要咸豐末修愈

孔固一井透山底深三十餘丈

凡若結砦六條一結砦如守城法其自修砦門塞間道設礮堡築堵卡建倉庫開塘池以及刀矛鎗礮旗數今約入砦者各顧身家性命不能不先事預防因時添辦此項量力派貲其貧者或有幹才有武藝有德望有役力足供一砦緩急應用之人免派一結砦通積倉法砦中人口繁多非積穀數千石萬一賊至廩虛或兼年荒穀歉豈能枵腹空出飢而相爭困而自亂亦勢不免也今約入砦者或遠在三五十里外每口出穀若干入之公倉仍歸本口作兩三年支用此明周台公公督私藏遺法多穀人家外有餘穀或寄存公倉或自藏私倉更爲有備無患其近在三五

仁壽縣志

卷一

輿地志

砦

十里內除富家積穀亦用前法外所有貧戶不能積穀但有執業准其臨時各備口糧而來一結砦仿安營法務使比屋而居便於朝暮守望今約入砦者各聯各家就地結屋聚處成團但不得架草棚以防火患又家必蓄池水以便利用至屋外更宜築牆開一缺口容一人出入此許忠節公遺法但一人持短刀守之門開而賊不敢入者也一結砦兼屯田法賊無累月攻一砦之理居砦者亦無盡人坐食一砦之理况無賊警其時本安閑今約入砦者或家不甚豐儘可各尋本業耕貿如常或意不甚便暫歸故廬居遊自在但畱老少婦女砦中一聞賊至或數十里百里外壯男輕身上砦可也其有各家私積銀錢穀米衣物器用緊要一切俱宜先時運入砦中或公上倉庫記存或自下房廂收管若待賊來便搬運不及徒爲若輩搜括去耳一結砦本堅壁法所謂各顧其家室老幼蓄積齊力出而禦賊以逸待勞不仰於官於兵而賊不能擾也然堅壁不清野一旦賊來有人可掠以爲嚮導有糧可資以老攻圍此砦終不足恃今約



入砦者殷實以外附近砦二三十里居人或係貧戶或係單丁本有執業良民所苦不能盡識但取砦內有身家人認保准其臨時入砦共相保守如此則天險在砦而仰無可攻打人糧歸砦而俯無可搶掠我氣愈壯而賊勢愈衰可不驅除而散也一結砦參居常法有警則避賊而來無警則攜家而去往往砦爲一空只餘各屋砦門得不爲奸人寢處反以釀亂今約入砦者公議一人爲主常常此居各家歲派若干錢文助請三四人看守砦門砦缺各屋以防藏垢納汙或有耕種土田認佃納租砦主爲常凡若連山砦詩陵谷滄桑事信然去年不料况來年中樵隱今何在剩下我來醉倒眠又白雲深處迥入間險設重門鎖日關不似當年榛莽地一羣烟戶一羣山又要知堅壁未爲難各各下山膽便寒道聽一聲流寇至倒成清野不成團又雲斷烟連幾萬家環山流竄賊如府一般守望鄉田意莫漫嫌生爲鼠牙又聽說哀鴻望有年生涯冷落雲邊米鹽有食吾知分只是囊中怕沒錢

仁壽縣志

卷一

輿地志

七

紅崖關在治南九十五里紅崖溝兩旁十丈許高巖一夾道約四丈寬路通榮縣咸豐辛酉爲卡扼其要高三丈餘門僅容一人一騎過

水塘一道士溪一奉國寺有烟墩哨樓牌架

橋屬

文林橋挹仙橋三聖橋迎恩橋里仁橋皆附城跨龍水雙橋左家橋王家背橋踏水橋大石橋費家菴橋觀音橋龍過灘橋余家橋老余橋張家橋李家橋金祥橋塔瑞橋宋家橋中和橋辜壩橋鳴池橋滑石灘橋蘭溪橋



百塔橋皆跨龍水

鎮金橋貴平橋梧桐橋龍橋瑞雪橋皆跨綠水

幸訓鼎瑞雪橋記略龍橋下五里有橋圯久矣歲屢  
歉不果築道光辛巳壬午歲熟甫謀畚鍤自秋徂冬  
苦旱田龜坼中輟癸未春孟雨雪兩日爰鳩工已而  
時雨頻滋麥苗競秀橋告成眾好善力抑非年豐莫  
致瑞雪其兆也遂名曰瑞雪橋

鼎福橋小龍橋永安雙橋萬古橋樂善橋功德橋飲虹  
橋皆跨老蠻灘合上三溪水

仁壽縣志

卷一

輿地志

架

利濟橋張祿世濟橋鳳儀橋永清橋皆跨下宋家橋水  
廖愛周太極橋上通高場下通鼈林

馮家駒陸店橋大滑石小滑石橋跨滑石溪水

廖榮興橋跨中壩井溪水

高燦忠橋跨牛角砦溪水

張雋儒九洞橋黑壩橋跨二峩山水

馮家駒石堰橋跨江家壩亂石堰龍水

馮家駒興隆橋跨馬鞍山水

高橋跨紅巖溪水



環秀橋治東四十里馳家河跨漣支水

馬百齡環秀橋記畧環秀橋水源出寶峰寺上游逮與漣支水合勢寔巨自建橋水圯七癸酉復築未幾爲水破閤數載又幾落成夏雨涉秋不止水大潰木石盡爲泆流漂壞久之議修以道光乙酉冬經始丁亥春成共費金二千有奇除勸募外悉首事捐前令胡竹塘先生嘉之以謂旣碩且堅將於斯萬年永鞏也爰名曰環秀云

張應先延壽橋治南五十里

仁壽縣志

卷一

輿地志

七

任天祿歸美橋治南五十里

吳飛龍妻程氏長生橋治南五十里

太平橋白塔寺橋車漕溝橋段家橋青石橋梅藍橋金象橋雙虹橋蕭仕鷄通江橋近坪橋戴寺橋廣濟橋通濟橋謝菴寺橋孫家堰橋高河坎橋長生橋迴龍橋安樂橋皆跨偏壩河水

夏健梅藍橋詩大橋側畔小橋橫路路行人穩涉情怪底漁郎都不俗一聲款乃夾溪鳴又鱗鱗雁齒鏡中排一樣慈航度穩開劃出彩虹明左右知誰執杖



兩翻來 陳演近坪橋記畧仁壽治偏壩河威榮二  
邑通津每夏秋漲溢幾成巨浸汪君朝魁慨然捐資  
力計費金五百餘石程十餘里工役四百人年餘工  
竣名之曰近坪橋近坪者汪君之字也崇禎五年

陳韶翁近坪橋詩亂峯圍樹水涵天八洞飛橋百尺  
連兩岸平沙舒菜甲數家茅店散茶烟魚吹細沫漁  
船網馬立斜陽客路鞭小小通衢人影滿分明圖畫  
近坪前 王爾鑑廣濟橋詩崎嶇山徑裏宛轉澗溪  
穿野渡愁新漲石渠利大川虹蟠雲際樹人影鏡中

仁壽縣志

卷一

輿地志

雜

天彼岸回頭處更無深塹懸 李春旺通濟橋記畧  
治東二十里向家堰通資邑羅泉要津問渡者恆嗟  
匏葉正德中有僧舟相與鄉耆李克燦方某曾建一  
橋歲久盡頽董公文宣好捐施先建橋猴爬灘不呼  
將伯後此地罄橐囊不數月告竟天下非僅斯橋可  
濟倘通濟之創實博濟倡矣崇禎七年

金魚橋明劉維表星齋橋今天星橋皆跨通江水

魏坪三洞橋紅崖溝橋花灘橋青獅叟橋黃連橋鐵牛  
壩橋三星橋清水河橋聯陞橋燈草壩陳周望蘇世彥



同心橋八仙橋觀音灘橋顧家沱顏昌阿永清橋古老人橋寶珠塲續龍橋呂公橋黃家橋斗尖子橋魁家灘徐東久樂善橋八洞橋老漣橋高橋滑石灘橋皆跨寶珠溪水

凡若永清橋序顧家沱舊有橋圯每漲急不得退嘗過而苦之聞威邑顏君昌阿好造橋家君芸薌公屬寄聲建此於其成詩以頌之顏橋隱隱灤水洶洶有來修者威之顏公公距陵陽路三百里一紙書來慨然經始乃伐白石就此為梁規浮月半影落虹長有河則徙有水則乾乃公之橋亘古不遷非石則堅公德如此濟人不私視遠猶邇旣告橋成公曰永清何以贈公亦惟令名乃筮吉日豎碑萬載嗚呼休哉橋在公在

馬百齡樂善橋記畧樂善橋在治東魁家灘

仁壽縣志

卷一

輿地志

七

舊名永定赴州孔道初建乾隆季年以道光辛卯夏雨圯人病涉者二載餘邑貢生徐東久獨鳩工躬數月竣橋捐用金千餘鎰前邑令李公多之其徇義可旌也乃更橋名樂善云

陰德橋跨陰溪溝水

來龍橋樂善橋跨柳溪水

謝世清世澤繼善橋新橋漆光華平石橋太平橋跨鹿溪水

白店壩橋郭家寺橋皆跨石滾河水煎茶溪鹿溪水



小蘭橋清水舖橋牛筋橋雙橋永濟橋迴瀾橋鄒永信  
大德觀音橋皆跨倒流水

正楊橋跨藉田舖小溪

葫蘆觜橋新橋壽福橋跨葫蘆溪入寶珠場水

三星橋跨藉田舖三水匯流中江

聯陞坡下漆光華雙濟橋錢家壩橋楊柳場橋梅橋皆  
跨魚蛇水

龍居場幹維斗石河溝橋東閣廟橋

胡江氏永安石橋

仁壽縣志

卷一

輿地志

一百

胡維厚際盛平橋

黃龍溪上渡下渡小河渡大河渡皆仁華五里要津

同治甲子爲渡船五歲五首事經理募置田租資舟  
子口食培修船費乙丑高氏祠爲義渡一黃龍溪江

歲費錢五十串

古佛洞林唐氏義渡

曹家場橋查家場橋積福場橋五皇廟大橋碗廠上鵲  
橋下雀橋袁文藩章珠鐵馬橋高灘橋汪朝黽黎良奇  
三陞橋劉田壩橋官渡河橋宋家橋和尚巖橋江口河



橋廖家塌橋回龍場橋龔家壩橋三級橋黃連橋蕭仕  
鷄大車堰橋皆跨官渡河水

凡若三陞橋記三陞橋在陵陽南百二十里上達成  
都資州下趨嘉定榮威而日夕往來不斷則大都人  
牛負炭者也當衝一大水發源分水嶺龍潭中流鐵  
馬橋受諸小水下流犍爲乾柏樹會合大江每秋夏  
漲湍流甚怒舟楫不通明萬歷汪朝黽獨創石橋迄  
乎國朝沙壅橋陷乾隆壬子黎良奇獨力增高五尺  
道光以來又經沙沒微漲已病涉矣戊申黎世堯募  
資又增高七尺六寸增橋一硖曰三陞橋言經三修  
而陞高也橋下里許一小橋太低另建拱橋  
仍曰三級橋計費共五百餘緡經六月告竣

東溝馬頸坳雙河口橋斷橋廖坡橋盤溝橋矮橋蔡萬

洪翔鳳觜橋袁文藩李白渡橋鎮江橋雷鉢坳橋汪場

仁壽縣志

卷一

輿地志

三


蕭大鵬沈溝霜橋俱跨官渡河上流水

姚德隆壽康橋跨觀音沱江口河水









仁壽縣志

卷一

輿地志

凡若注縣山自北龍泉驛起丹景山右開大林秦皇  
 煎茶蘇馬頭一帶大山抵黃龍溪盡綿亘又數十里  
 牛角若婆支山一大跌斷過峽金龜山左開高場鼇  
 林簡州貴平向場梧桐馬溪龍橋鳴池場一帶大山  
 抵北斗鎮盡中開將軍觀音圓通寺場一帶小山又  
 數里夫子巖一大跌斷過峽油灌頂山右開二峩石  
 膏清水舖一帶小山又數十里馬頭嘴高聳起馬鞍  
 山一大跌斷過峽射箭坪左開文公一帶小山又十  
 數里起尖峯山右開楊柳貫壩永興里仁黃豐場一  
 帶小山北抵黃龍溪南抵江口場盡又數里左開大  
 滑石一帶小山又十數里蒼莽起楊家大山右開分  
 水舖龍居場一帶大山嵯峨又十數里至馬落巖左  
 開飛泉青岡寶馬場一帶大小山轉西蜿蜒十數里  
 挺特起石矩山越踞鼇山西拖翳嘶東攬飛泉為縣  
 治又二里一大跌斷過峽杜家嘴右由西門坡開虞  
 場一帶大山又數里陡削起石陡坡橫亘至拖斷山  
 左開滿水并一帶小山又十數里五顯場右開彭場  
 一帶大山抵河壩十盡又二三里左開趙場一帶小



山轉南盤曲數十里起高東山右開井研一帶大山  
抵篋街橋溝盡又數十里透迤至周家坡分水嶺一  
大帶斷過峽平田數里至鄭古塘左開觀音橋油碾  
一帶小山又數里平岡至王家廟右開井研石牛壩  
一帶小山抵井治盡又數里左開鍾祥鎮子五皇寶  
珠富加玉龍張橋謝安寺場一帶小山又十餘里秀  
拔起小大烟山右開松峯井研一帶大山抵竹園乾  
柏樹盡轉東由涼風坳越七郎坡南陽嶺白巖阮巖  
獅巖左開哨樓紅巖張場涂場燕嘴一帶大山右錯  
開蘇巖鷓鴣莊一帶小山又數里開汪場涼水則嘉壩  
跌斷過峽柏林均息壤山右開廟山左開鳳台鳳嘴徐溝一帶  
寺一帶大山又五里許大墳場右開鳳台鳳嘴徐溝一帶  
大山又十數里鬱積起霍山左開祿場石金剛和場  
週龍場羅泉井一帶大山抵北斗鎮盡轉南鬱勃數  
十里至馬頸坳一大跌斷過峽半邊寺山大磅礮起  
櫃巖右開向砦高砦雷砦一帶老山又二三里折落  
大突兀起而母山左開內江富順一帶大山抵資沱

仁壽縣志 卷一 輿地志 高

江盡越鐵門坎迺折至分水嶺右開皮鼓查場碗廠  
復興迴龍場一帶老山正幹由大肚羅漢雙古墳豆子山抵  
威榮一總計縣山皆蒹葭枝其體武曲或兼文曲頗  
瀘州盡總計縣山皆蒹葭枝其體武曲或兼文曲頗  
少木火土星辰兩山間則水治北簡界龍泉驛起於  
溪水簡界土主廟起赤水馬鞍山起倒流泉水俱瀝於  
藉田鋪而黃龍溪為水口治北之西楊家大山起魚  
蛇水劉家溝起陰晴溪水魚蛇水至太乙壩受楊柳場  
水至黑龍灘受陰晴溪水魚蛇水至太乙壩受楊柳場  
十五里受毛家坡水二十里受毘迦寺水三十里受  
楊家廟水四十里受大石板水乃匯魚蛇水於雙河  
口而龍居場為水口治南汪場獅崖息壤山水與李  
白渡受東溝馬頸坳貓兒崖櫃崖溝盤溝橫溝魯溝  
水碗廠河受曹溝查場楊溝鄧溝濫泥溝扒巖溝水  
俱瀝於劉田壩官渡河南之西擁斯茫水源出分水  
嶺下受石牛山皮溝水俱瀝官乘墩韋溝水牛砦三陽溝  
水柴家山倒石橋水俱瀝官乘墩韋溝水牛砦三陽溝  
下而大車堰為水口治北婆支水起婆支山受夫子



崖水紅崖溝水馬鞍山水尖峯山大滑石水滙龍水  
於蟠溪馬蹄瑞雲山間綠水起簡州山受觀音寺劉  
大人溝夏家溝女仙溝乾古井楊家溝賈家河六水  
滙龍水於辜家壩龍橋龍水起治北龍王溝下流受  
婆支水綠水滙通江水於孫家壩又下流滙清江水  
於清水寺為治北之東之南諸水大滙通江水起井  
研蠻泥溝右受觀音橋鍾祥場梅藍橋鎮子場金玉  
橋水左受趙家壩水滿水井一帶水經五皇場富家  
場至孫家壩滙龍水清江起涼風均受魏坪水札  
營山毛河水經張家壩受紅崖溝水下流受漏洞河  
水祿加場鯉水石金崗和家場週龍場水至清寺  
滙龍水通江清江之既滙龍水也而婆支水綠水已  
早大滙而崇柏沱柳融為之瀦旱五里為之止北斗  
鎮下右砦子寺山左楊家大砦山為之門戶外五里  
資江蓮花石為之砥柱實為縣之東之南之北一大  
水口強於大車堰數倍若黃龍溪龍居場二水口更  
無論矣此外有櫃崖背右一水起石筍巖經紙廠溝  
石金岡下羅泉井龍結鎮四眼橋資沱江華界錦江

仁壽縣志

卷一

輿地志

夏

水經菩薩崖蘇馬頭奉國寺紅花鎮古佛場嘉禾莊  
合津岷江抵彭山界均為外流無復為縣水口有山  
水大會則有大壩其山水之奇則玲瓏焉為洞磊落  
焉為石清江以北山土多以南石多其土通江以北  
粗而枯色紅以南迄清江北厚而精色黃清江以南  
近老山細而緊色黑其水鹿溪水赤水倒流水魚蛇  
水陰晴水龍水婆支水綠水通江水皆濁清江水錦  
江水皆清官渡水擁斯茫水尤清而利山多土多石  
不同故也